

Adat Negeri Sembilan Melalui Masa

OLEH. NORHALIM HJ. IBRAHIM.

SEMINAR SEJARAH ADAT

PERINGKAT MSDK

"SEJARAH ADAT DALAM PEMBANGUNAN"

TARIKH : 21 SEPTEMBER 1993

TEMPAT : ALLSON KLANA RESORT
SEREMBAN

TAJUK : "ADAT NEGERI SEMBILAN MELALUI MASA"

Oleh : Y.Bhg. Prof Madya Norhalim b Hj Ibrahim

UPM, Serdang.

Anjuran:

Persatuan Sejarah Malaysia
Cawangan Negeri Sembilan

ADAT NEGERI SEMBILAN MELALUI MASA
(Dengan merujuk kepada Luak Rembau)

Oleh: Norhalim bin Hj. Ibrahim
Jabatan Pengajian Pembangunan Keluarga
Universiti Pertanian Malaysia.

1. PENDAHULUAN

1.1 Pewilayahan Negeri Sembilan

Negeri Sembilan mengandungi daerah-daerah yang sekarang dikenali sebagai Rembau, Seremban (di zaman tradisi dikenali sebagai Sungai Ujong), Jelebu, Kuala Pilah (yang merangkumi nagari-nagari atau luak-luak Sri Menanti, Gunong Pasir, Terachi, Ulu Muar dan Inas; serta sebahagian daripada Luak Johol), Jempol, dan Tampin (sebelum tahun 1842 sebahagian daripada daerah ini adalah untuk Luak Rembau; dan sekarang, sebahagian daripada wilayah Johol terletak dalam daerah ini). Daerah Port Dickson, sebelum tahun 1883 adalah sebahagian daripada Negeri Selangor. Pada tahun tersebut, ia telah dijadikan sebahagian daripada wilayah Negeri Sembilan setelah ditukar ganti dengan wilayah Semenyah yang sebelum itu adalah sebahagian daripada Negeri Sembilan, khususnya kepunyaan Sungai Ujong.

1.2 Penghijrahan Penduduk Ke Negeri Sembilan

Orang Melayu yang menduduki ke enam buah daerah terawal tadi dipercayai adalah keturunan penghijrahan dari Sumatera, sama ada dari Minangkabau atau Siak. Mereka telah mulai datang ke kawasan sini (Negeri Sembilan dan Naning), Rejak dari sekitar abad ke sembilan Masihi lagi dan telah berjaya menegakkan beberapa buah kerajaan di sekitar abad ke empat belas dan lima belas (Norhalim bin Hj. Ibrahim, 1993: 78).

Secara umum penghijrahan mereka dapat dikategorikan kepada dua jenis: berbentuk penghijrahan berperingkat, dan penghijrahan langsung. Pada zaman awal, di sekitar abad ke sembilan sehingga keagungan kerajaan Melayu Melaka, orang-orang Minangkabau

telah keluar dari dataran tinggi Sumatera ke kawasan timur Sumatera seperti Jambi, Palembang dan Siak untuk berniaga atau/dan membuka penempatan baru. Kemudian mereka dan/atau generasi kedua telah merantau pula ke Semenanjung Tanah Melayu terutama ke Tumasik. Dari Tumasik iaitu mungkin di sekitar abad ke dua belas (Newbold, 1839:77)

Mereka berhijrah pula ke utara untuk menjalankan (1) perniagaan di Kuala Muar dan Kuala Penajoh dan membuat petempatan baru yang berbentuk sementara kekal di bahagian pendalaman Sungai Penajoh dan Sungai Siput, iaitu di Rembau dan Naning.

Di zaman kerajaan Melayu Melaka pula penghijrahan telah mulai berubah selain dari penghijrahan berperingkat, orang-orang Minangkabau telah datang terus dari tanah tinggi Sumatera ke Melaka dan bahagian pendalaman kedua batang sungai tersebut di atas. Akibat dari tidak putusnya penghijrahan ini maka petempatan yang sebelumnya bersifat sementara-kekal menjadi penempatan kekal.

Dalam masa abad yang berikutnya, dari kedua petempatan asal ini (Rembau dan Naning) mereka telah berhijrah pula ke kawasan lebih pendalaman seperti Sri Menanti, Ulu Muar, Gunung Pasing dan Johol. Di samping itu orang-orang Minangkabau yang datang terus dari Minangkabau, sebahagian memudiki Sungai Muar sehingga ke kawasan hulunya dan melalui jalan penarikan telah membuka Jelebu, Jempol dan Ulu Muar.

1.3 Pembentukan Sistem Adat Perpatih

Orang-orang Minangkabau yang datang membuka rantau di Negeri Sembilan dan Naning ini telah membawa bersama sistem sosial dan konvensi budaya tempat asal mereka. Oleh sebab di petempatan baru itu telah siap ada penduduk watannya yang pula mempunyai dasar sistem sosial yang sama, iaitu sistem nasab-ibu, maka berlaku pengubahsuaian secocok dengan keperluan dan kehendak keadaan persekitaran baru; namun prinsip-prinsip dasar sistem adat Minangkabau dibekalkan. Justeru itu, dan melalui masa terjelmalah suatu sistem sosial dan konvensi budaya yang secara keseluruhan dikenali sebagai Adat Perpatih.

Adat perpatih adalah suatu adat yang mempunyai persamaan dengan sistem adat Alam Minangkabau, terutama sekali dari segi prinsip, namun secara keseluruhan dan terperinci adat perpatih bukannya Adat Alam Minangkabau, seperti yang difahamkan oleh orang-orang Minangkabau & Sumatera Barat. Adat Perpatih adalah adat yang unik ke Negeri Sembilan amnya.

1.5 Variasi Sistem Adat Di Negeri Sembilan

Harus juga diambil perhatian bahawa tidak keseluruhan wilayah geografis Negeri Sembilan hari ini mengamalkan Adat Perpatih. Sebahagian besar daripada penduduk Melayu di daerah Port Dickson yang tinggal di kampung-kampung di pinggir pantai dan di sekitar 'pekan' Linggi serta Lukut tidak mengamalkan Adat Perpatih. Kebanyakan daripada mereka, terutama di kawasan sekitar Linggi, adalah keturunan generasi kedua orang Bugis Riau. Orang tua-tua di Linggi menyebut adatnya sebagai muafakat bil kitalo wassunati gabulatan minat ustaz yamonati (Norhalim bt Hj. Ibrahim, 1993: 89). Komuniti-komuniti kampung yang tinggal berhampiran dengan sempadan daerah Port Dickson - Seremban, seperti Rantau adalah orang beradat perpatih kerana sebelum tertanda sempadan daerah moden (Port Dickson - Seremban) kawasan-kawasan tersebut adalah sebahagian daripada wilayah Sungai Ujong, yang menjadi sebahagian daripada wilayah di Air Sungai Ujong dan terletak di bawah tadbiran Datuk Shahbandar Sungai Ujong.

Di samping perbezaan sistem adat antara daerah Port Dickson dan daerah-daerah lain di Negeri Sembilan terdapat juga kelainan sistem adat di kalangan Luak-Luak Tradisi. Secara keseluruhan, wilayah Adat Perpatih di Negeri Sembilan dapat dibagikan kepada dua kelompok, iaitu wilayah Luak Berundang dan Luak Tanah Mengandung.

Luak Berundang adalah terdiri dari Rembau, Sungai Ujong, Johol dan Jelebu (jikalau di lihat dari perspektif Negeri Sembilan tradisi, termasuk juga Luak Naning). Tampin tidak termasuk dalam wilayah Luak Berundang kerana luak ini adalah buatan penjajah Inggeris. Sebelum tahun 1842 Tampin (Repah, Tamping Tengah, Keru dan Tebong) adalah kepunyaan Luak Rembau.

Selanjutnya, di kalangan Luak Berundang ini, jikalau diteliti secara terperinci akan terdapat perbezaan antara satu luak dengan yang lain. Kelainan yang ketara sekali adalah dari segi struktur dan organisasi politik setiap luak yang berkenaan.

Luak Tanah Mengandung terletak di bahagian tengah dan timur Negeri Sembilan. Luak-luak tersebut ialah Inas, Ulu Muar, Jempol, gunung Pasir dan Terachi. Empat luak terakhir merupakan wilayah yang pernah bernaung di bawah pentadbiran undang Luak Johol. Berlainan dengan Luak Berundang tadi, pemimpin adat di luak kecil ini di sebut Penghulu. Yang menjadi pusat kepada lima buah Luak Tanah Mengandung ini ialah Seri Menanti. Seri Menanti tidak mempunyai Undang atau Penghulu, tetapi merupakan tempat bersemayam Yang Dipertuan Besar Negeri Sembilan. Penghulu-penghulu Luak Tanah Mengandung berada di bawah naungan Yang Dipertuan Seri Menanti.

Kenyataan terakhir ini juga menjadi pembeza antara Luak Berundang dengan Luak Tanah Mengandung. Luak Berundang adalah luak-luak yang merdeka, berdiri dengan sendirinya dan tidak bernaung di bawah Seri Menanti,

1.6 Adat Perpatih Negeri Sembilan

Mendasarkan cara hidup mereka kepada bersawah padi, masyarakat dan budaya tradisi Negeri Sembilan wujud atas suatu sistem sosio-ekonomi komunal yang berlandaskan kekeluargaan. Sistem ini adalah berpusatkan kepada prinsip keturunan nasab ibu. Pada peringkat struktur sosial, adat ini berkisar atas suatu susunan perhubungan-perhubungan dan proses-proses sosial dan ekonomi yang menjadi ciri kepada kebanyakan masyarakat nasab ibu di dunia ini. Ciri-ciri ini termasuklah keahlian dalam kelompok keturunan nasab ibu (di Negeri Sembilan diistilahkan sebagai suku dan pecahannya) yang mempunyai nama tertentu, petempatan matriloal selepas berkahwin dan justru itu mempunyai pola-pola susunan kehidupan seharian dalam rumahtangga dan keluarga nasab ibu luas, memiliki harta (tanah ladang atau/dan dusun, tanah sawah dan tanah kawasan rumah) atas dasar kepunyaan bersama kelompok kekeluargaan dengan hak pakai atau ompokan daripada ibu kepada anak perempuan; mengharuskan kooperasi ekonomi dan

sosial secara obligatori di kalangan ahli-ahli keluarga luas dan selanjutnya di kalangan ahli-ahli kelompok kekeluargaan yang lebih besar yang melibatkan tenaga kerja, sumber-sumber dan tanggungjawab-tanggungjawab terhadap anak-anak, dan sebagainya' dan pengagihan kuasa politik berdasarkan pemeringkatan hirarki kekuasaan sosial yang diterima.

Adat Perpatih juga adalah suatu sistem konseptual dan ideologi yang kompleks yang disedari secara jelas, suatu worldview yang menjadi pemandu dalam persepsi dan pemilihan pengamalannya. Sebagai suatu sistem konseptual di dalam adat ini termasuk aturan tertentu (kadangkala dalam bentuk-bentuk preskripsi undang-undang nyata) yang menggambarkan dan menjanakan pelakuan ahli-ahlinya seperti yang dibayangkan di atas tadi - di mana hendak tinggal, bagaimana mengompakkan harta, siapa yang bertanggungjawab ke atas anak-anak, dan sebagainya, serta juga suatu falsafah sosial dan semula jadi. Komponen-komponen konsep dan ideologi adat ini berkecenderungan untuk memperkokohkan satu dengan yang lain dan setiap satunya berurusan pula dengan berbagai tema yang berhubung kait antara satu sama lain. Justru itu, adat perpatih melalui interaksi dialektikal nilai-nilai berkenaan dengan tingkahlaku ekonomi, sosial dan politik yang dialami secara nyata oleh ahli-ahlinya dalam kehidupan sehari-harian melahirkan sesuatu cara hidup yang sesuai dicirikan sebagai komunal, agak egaliterian dan demokratik.

1.7 Perkembangan Sejarah

Jikalau kita menerima teori mengenai penghijrahan orang Sumatera seperti yang dibayangkan di atas, dan teori Newbold (1839:76.79) mengenai perkara yang sama, bermakna orang-orang Sumatera telah mulai sampai ke Rembau dan Naning tidak kurang dari 600 tahun yang lalu. Rembau (di samping Naning) yang merupakan petempatan terawal mereka kemudian menjadi pusat sosio-politik dan budaya untuk rantau Minangkabau di sebelah sini. Masyarakat ini telah melalui petas sejarah yang berbeza iaitu period tradisi Islam, zaman penjajahan, kependudukan Jepun dan zaman kemerdekaan. Setelah melalui masa yang begitu lama, peringkat sejarah yang berbagai yang setiap satunya mengasimilasikan nilai dan orientasi yang berbeza, banyak perubahan telah berlaku ke atas sistem sosial masyarakat yang diperkatakan ini.

Maka adalah tujuan kertaskerja yang pendek serta serba kurang ini untuk menjejak semula perkembangan sejarah sosial masyarakat ini agar dapat dikenalpasti perubahan-perubahan yang telah mengambil tempat, dan untuk mengutarakan, di mana mungkin, bahagian dan peristiwa-peristiwa yang bermasalah. Dengan itu, kertaskerja ini akan dibahagikan kepada peringkat-peringkat sejarah yang baru disebut dengan diakhiri dengan membincangkan keadaan masa kini sebagai penutup.

2. ZAMAN TRASISI ISLAM

Saya lebih suka memanggil period awal ini sebagai Period Transisi Islam dan tidak Zaman Melaka atau Zaman Kesultanan Melaka kerana imigran Sumatera telah membuka petempatan di sini pada masa yang lebih kurang sama malahan mungkin lebih awal dari pembukaan Negeri Melaka. Setakat ini belum ada bukti sejarah, baik yang lisan mahupun tertulis yang menunjukkan bahawa Rembau adalah di bawah Kerajaan Melaka. Walau bagaimanapun, kedua-dua buah 'kerajaan' mempunyai perhubungan terutama sekali dalam aktiviti perdagangan (Sejarah Melayu, 1954: 115,202)

Zaman awal ini boleh dibahagikan kepada dua peringkat, iaitu peringkat pembukaan dan peringkat menganut ugama Islam.

2.1 Peringkat Pembukaan

Dalam period ini dua peristiwa penting dapat diperhatikan. Pertama ialah aktiviti pembukaan negeri, dan kedua penetapan orang-orang Sumatera di wilayah yang diteroka. Masa yang dilalui untuk aktiviti ini agak lama iaitu hampir empat abad - abad kesembilan hingga abad ketiga belas. Ada beberapa faktor penyebab mengapa masa yang begitu lama diperlukan untuk mewujudkan petempatan tersebut. Antaranya ialah:

- 1) Petempatan yang diteroka adalah berbentuk sementara-kekal. Ini bermakna:

- a) Tempat yang diteroka adalah kekal, tetapi penghuninya adalah bersifat sementara.
 - b) Penghuni tersebut, pada musim tertentu keluar untuk menjalankan aktiviti ekonomi perdagangan.
 - c) Semasa mereka berdagang, petempatan itu akan 'digunakan' oleh kelompok lain- samada yang baru datang daripada Sumatera atau mereka yang telah 'balik' dari berdagang.
- 2) Sebilangan kecil dari peneroka itu tidak giat dalam aktiviti perdagangan. Mereka tinggal menetap di kawasan yang diteroka tadi menjalankan aktiviti pertanian. Di samping mereka terdapat juga sebilangan penghijrahan golongan pedagang yang akhirnya tinggal menetap di kawasan tersebut. Dengan itu petempatan itu akhirnya menjadi petempatan kekal.

Melalui masa, bilangan golongan kedua ini menjadi ramai. Dan oleh sebab mereka tidak mobile mereka telah berkahwin dengan gadis watan. Dalam sejarah adat Negeri Sembilan golongan ini adalah penting dan signifikan kerana mereka inilah yang memberi kepada kemunculan adat perpatih di Negeri Sembilan.

Anak wantan Negeri Sembilan, khususnya Rembau, iaitu orang Jakun, adalah juga masyarakat yang mengamalkan sistem kemasyarakatan nasab ibu (Baharom Azhar, 1984:4). Oleh sebab sistem sosial penghijrahan dan anak watan mempunyai dasar yang sama, maka aturcara tolak ansur budaya telah berlaku tanpa konflik ataupun penentangan. Ada berbagai-bagai bentuk aturcara tolak ansur yang mungkin berlaku - secara asimilasi, iaitu melalui 'perkahwin' dengan gadis tempatan, ataupun secara akomodasi, iaitu melalui penerimaan serta pengakuan hak anak watan. Dan, oleh sebab latarbelakang budaya dan pengalaman yang

lebih maju, maka golongan perantau tadi berkemampuan melaksanakan tradisi mereka ditempat baru ini, dengan pengubahsuaian di mana perlu. Dengan cara inilah sistem Adat Minangkabau itu diasaskan (tetapi tidak secara total) sebagai dominan di Negeri Sembilan.

Jikalau diteliti akan perkembangan petempatan perantau Minangkabau di Negeri Sembilan, nyata bahawa ia mengandungi tiga tahap berjalan serentak. Ia bermula dengan kompromi politik-budaya, diikuti dengan proses pengambilan tanah dan kegiatan ekonomi yang sehubungan, dan akhirnya mengasaskan sistem adat dan tradisi yang berkait dengannya (Norhalim bin Hj. Ibrahim, 1993:95).

2.2 Kedatangan Agama Islam

Fasa kedua zaman awal ini adalah berkaitan dengan menyerapan nilai agama Islam di kalangan masyarakat Negeri Sembilan. Bila dan bagaimana menganut agama Islam masih belum jelas. Beberapa andaian mungkin boleh diutarakan. Antaranya ialah:

- a) Penghijrah yang datang, iaitu generasi kedua orang Minangkabau di Sumatera Timur (Rantau Minangkabau Timur yang mengikut Mansoer dll (1970:47-48) telah menganut agama Islam sejak sekitar tahun 1000 Masihi) telahpun beragama Islam.
- b) Mereka memeluk agama Islam di zaman Kerajaan Melayu Melaka. Oleh sebab mereka mempunyai hubungan baik dengan Melaka yang ketika itu menjadi pusat Islam mungkin masyarakat Rembau juga turut beragama Islam.
- c) PengIslaman mereka dilakukan oleh Sheikh Ahmad, pendakwah Islam yang kuburnya terletak di Pengkalan Kemas sekarang.

Walau bagaimanapun pada akhir period ini sistem sosial masyarakat Rembau, sama ada sedang memperkuat keIslamannya ataupun sedang mengubahsuaikan sistem hidupnya dari yang bukan Islam kepada Islam.

Dari huraian ringkas di atas tiga perkara dapat diutarakan, iaitu:

- a) Perantau Sumatera itu datang sebagai petani yang mencari tanah baru dan bukan sebagai penakluk (Lister, 1890:130).
- b) Sehubungan dengan ini mereka adalah masyarakat yang memperkenalkan aktiviti ekonomi bersawah padi (Chung Siok Hwa, 1969: 130).
- c) Islam telah memberi atau memperkokohkan falsafah dan nilai keIslaman dalam perjalanan sistem sosial masyarakat ini.

3. ZAMAN ORANG EROPAH

Melaka jatuh ke tangan Portugis dalam tahun 1511. Ini memulakan suatu era orang-orang Melayu Rembau, yang berlanjutan sehingga meletusnya Perang Dunia Kedua. Era ini boleh dikelompokkan ke dalam dua kapsul masa iaitu zaman awal penjajahan dan zaman penjajahan Inggeris.

3.1 Zaman Awal Penjajahan

Zaman ini merangkumi dua peringkat iaitu zaman Portugis (1511 - 1642) dan zaman Belanda (1642 - 1824). Walaupun disebut sebagai zaman penjajahan, ini tidak bermakna bahawa Negeri Sembilan khususnya Rembau di zaman berkenaan telah dijajah. Sehingga abad ke sembilan belas, Rembau dan Negeri Sembilan masih bebas dan merdeka.

Perhubungan antara Rembau dengan kuasa-kuasa Eropah di zaman awal ini, pada dasarnya, adalah bercirikan perdagangan (Newbold, 1839:79). Namun, apabila orang-orang Portugis dan kemudian orang-orang Belanda cuba menekankan kekuasaan dan pengaruh ke atas orang-orang

Rembau, mereka telah menemui penentangan. Satu ciri utama penentangan ini adalah ia tidak 'diarahkan' atau 'digerakkan' oleh, demi kepentingan golongan pemerintah, bangsawan atau individu lebih kepada berbentuk tindak balas masa (orang ramai atau rakyat jelata) untuk mengekalkan kebebasan dan harga diri baik dari segi sosial mahupun perdagangan.

Semasa pemerintahan Portugis di Melaka tujuan utama penentangan itu adalah untuk menghalang Portugis dari memonopoli perdagangan Rembau. Dan di kala pemerintahan Belanda ia bercambah dari masalah orang-orang lawan Portugis dan penghambaan orang-orang Kristian di Rembau, dan juga perebutan untuk menguasai perdagangan (Parr dan Mackray, 1910; Winstedt, 1934:51, 55).

Menyedari hakikat bahawa mereka tidak berkemungkinan bertahan lama menentang kuasa Eropah yang lebih kuat, orang-orang Rembau dan Negerinya yang semibilan telah cuba mendapatkan pengantaraan dan perlindungan politik daripada Kesultanan Johor. Namun, oleh sebab Kerajaan Johor sendiri di sekitar pertengahan 1500 an sedang menghadapi masalah - dari dalam dan luar, orang-orang Rembau, dalam tahun 1540, telah memilih dan melantik salah seorang dari rakyatnya menjadi pemimpin. Beliau, iaitu anak lelaki kepada salah seorang dari ketua adat terawal yang datang ke Rembau telah diberi gelaran Penghulu. Untuk membantu dan menasihatkannya dalam hal ehwal pentadbiran sebuah majlis penasihat, yang dipanggil Lembaga Tiang Balai telah dibentuk.

Semasa orang-orang Portugis dan Belanda, terutama sekali Portugis, berada di Melaka, mereka tidak campurtangan dalam kehidupan politik dan sosial di Rembau. Kepentingan utama mereka adalah perdagangan. Sebarang konfrantasi dengan Melaka adalah berkaitan dengan masalah perdagangan, dan dalam proses membantu Kerajaan Melayu Johor mencuba menawan semula Melaka dari tangan penjajah. Sebaliknya, pula, Rembau tidak dapat mengharap sangat sokongan dan bantuan Johor apabila berlaku konfrantasi aktiviti ekonomi dengan Melaka kerana kedudukan Kerajaan Melayu (2) Johor sendiri adalah tidak menentu.

Untuk menjaga kestabilan politik dan ekonomi Rembau tidak ada pilihan melainkan menyusun semula sistem politiknya. Rembau dan luak-luak lain memerlukan seorang penaung atau seorang raja untuk menjadi lambang 'keadilan'. Dengan demikian, Rembau sebagai penggerak utama bersama dengan Sungai Ujong dan Naning telah (3) menjemput Raja Ibrahim daripada Sumatera dalam tahun 1673 (Winstedt, 1934:59, Andaya, 1987:146). Walau bagaimanapun Raja Ibrahim tidak berkesempatan untuk menduduki status berkenaan kerana pada tahun 1678 beliau (4) telah mati terbunuh (Winstedt, 1934, 54; Andaya, 1987:153).

Sejarah Rembau dan Negeri Sembilan berkaitan dengan kehadiran putera-putera raja selepas kematian Raja Ibrahim, terutama sekali dalam abad ke lapan belas adalah masih kabur dan berserabut. Setakat hari ini terdapat dua versi utama berkaitan dengannya.

- i) Versi pertama adalah naratif yang disarankan oleh penulis-penulis awal (penulis kolonial) seperti Wilkinson, Winstedt dan Skeppard. Mereka, dalam penulisan telah menggunakan sumber belanda. Penulisan mereka ini telah pula menjadi bahan rujukan kepada penulisan berikutnya, sama ada oleh penulis tempatan atau pun luar.
- ii) Versi terakhir adalah data yang diperolehi oleh Andaya (1987) yang telah menyentuh secara tidak langsung persejarahan Rembau dan Negeri Sembilan semasa membuat kajian mengenai Kerajaan Johor antara tahun 1641 - 1728. Khoo Kay Kim, yang pada awalnya juga antara lain menggunakan sumber versi pertama kini (mulai tahun 1984) dengan menggunakan dapatan Andaya telah mempersoalkan kesahihan versi pertama itu dan memberikan penemuan dan dapatan baru (1990:5-10).

Untuk pengetahuan, di sini saya turunkan secara ringkas kedua-dua versi tersebut.

3.1.1 Penulisan Sejarahwan Kolonial

Selepas kematian Raja Ibrahim, (5) datang pula Raja Kasah. Beliau berada di Rembau pada tahun 1722 (Wilkinson, 1911:19). Ada sumber yang menyatakan bahawa beliau telah dijemput oleh Penghulu Rembau (Datuk Sedia Raja Sabat atau Subuh) sebagai penggerak, berserta dengan Penghulu-Penghulu Sungai Ujong (mungkin Datuk Cantik atau Datuk Rumah Gedong), Jelebu (mungkin Datuk Mentunggang) dan Penghulu Naning. Atas sebab-sebab tertentu Raja Kasah telah dihantar balik ke Minangkabau (Buyung Adil, 1952:172) mungkin di sekitar pertengahan tahun (6) 1720an.

Tindakan Rembau dan sekutunya menjemput dan membawa raja daripada Minangkabau ini telah membimbangkan Kerajaan Melayu Johor - Riau. Kehadiran putera raja daripada Sumatera di Rembau bermakna pegangan Johor ke atas Rembau dan Negeri Sembilan semakin longgar. Untuk memastikan Rembau tetap berada di bawah naungan Johor, Raja Sulaiman (1722 - 60) telah (7) menghantar Raja Adil sebagai wakil Kerajaan Johor dalam tahun 1740an. Penghulu Rembau, Datuk Sabut (Subuh) yang memerintah antara 1710 - 1750 terpaksa menerima kehadiran Raja Adil. Untuk mengendurkan ketegangan, Raja Adil telah diberi tempat di kawasan Pedas yang terletak di bahagian (8) Rembau Darat (Parr dan Mackray, 1910:16). Besar kemungkinan Raja Adil campur tangan perlantikan Datuk Lulinsoh (1750 - 1790).

Akibatnya, dalam tahun-tahun awal 1750an sehingga tahun 1761, Raja Adil banyak terlibat dalam perhubungan

luar Kerajaan Rembau, terutama yang berkaitan dengan Bugis dan Belanda. Kekuatan pengaruh Raja Adil ini sampai ke puncaknya apabila putera-putera Bugis, khususnya Daing Kemboja dan Raja Haji yang telah membuat petempatan di Kuala Penajoh, Kota Pedas dan Pedas. Raja Adil hanya dapat disingkirkan daripada Rembau di sekitar tahun 1761 iaitu apabila Daing Kemboja dan Raja Haji meninggal Rembau dan (10) balik ke Riau .

(11)

Dengan tersingkirnya Raja Adil (12) daripada Rembau maka pengaruh Kerajaan Johor-Riau ke atas Rembau mulai merosot.

Pengalaman Kerajaan Rembau bersama dengan putera-putera Bugis untuk hampir sepuluh tahun itu telah memperkuat lagi keinginan Rembau dan Negeri Sembilan untuk mendapatkan seorang 'raja' (13) sebagai lambang. Atas inisiatif Rembau bersama dengan Jelebu dan Naning (Sheppard, 1965:13 - 14 - Penghulu-Penghulu Johor dan Sungai Ujong menentang perbuatan tersebut) (14) dua orang panglima dengan diiringi oleh lima orang wakil luak-luak yang berkenaan telah ke Pagarruyung untuk mendapatkan seorang anak raja.

Permohonan penghulu-penghulu Negeri Sembilan itu telah diperkenankan oleh Yang Dipertua Pagarruyung, tetapi memohon tempoh untuk membuat 'pemilihan' dan mengadakan persiapan-persiapan tertentu gunakan menitiskan 'daulat' dan 'kebesaran' kepada bakal 'simbol' 'keadilan' di rantau Rembau. Setelah utusan itu balik, Yang Dipertuan Pagarruyung telah mengutus Raja Mahmud untuk menjadi Yamtuan di Negeri Sembilan. Terdahulu daripada itu seorang pembesar, Raja Khatib atau Raja Katik (Rasjid Minggis, 1970:89) telah diutus untuk 'membuka jalan' dan

'mengadakan persiapan' untuk menyambut kedatangan bakal Yamtuan. Raja Khatib telah sampai ke Negeri Sembilan sekitar awal tahun 1771/2; dan telah mengisytiharkan dirinya sebagai anak raja yang diutus oleh Yang Dipertuan Pagarruyung.

Raja Mahmud yang kemudian (15) dikenali sebagai Raja Melewar telah tiba di Rembau di sekitar akhir tahun 1772 atau awal 1773. Beliau, setelah berjaya 'menghapuskan' musuh politiknya serta dapat mempengaruhi Penghulu-Penghulu Luak Sungai Ujong, Ulu Muar dan Johol telah dinobatkan (dikerjankan) menjadi Yang Dipertuan di Penajoh Rembau pada tahun 1773.

3.1.2 Versi Mutakhir

Mengikut versi ini, Raja Melewar telah berada di Rembau di sekitar awal abad ke lapan belas. Besar kemungkinan Raja Melewar telah mula memerintah pada tahun 1700 Masihi, bersamaan tahun Hijrah IIII (Khoo Kay Kim 1990:9) dan ditabalkan sebagai 'Sultan Mahmud Shah Ibni Al-Sultan Abdul Jalil Muadzam Shah'. Kenyataan ini adalah berdasarkan sumber Belanda yang menunjukkan bahawa Raja Rembau pada ketika itu (tahun 1720an) adalah Raja Melewar. Ini bermakna juga bahawa Raja Melewar telah berada di Rembau lebih awal dari Raja Khatib kerana Raja Khatib telah dihantar oleh Raja Kecil (Raja Siak/Johor) ke Rembau pada tahun 1727. Tujuan Raja Khatib ke Rembau adalah untuk menggulingkan Raja Melewar yang sememang telah ditetapkan sebagai Raja Rembau.

Mula-mula Raja Khatib berjaya dan cuba, selanjutnya, meluaskan pengaruhnya ke Naning serta kawasan-kawasan lain seperti Seri Menanti, Johol dan Tampin. Tetapi dalam

serang balas yang dilancarkan oleh Raja Melewar, Raja Khatib tewas dan terpaksa melarikan diri ke Naning, di mana, kemudian dia diberkas oleh orang Belanda dan dihantar balik ke Siak pada 15 Februari 1728 (Andaya, 1987:412-413; Khoo Kay Kim, 1990:5).

Raja Melewar mungkin telah mati pada sekitar tahun 1740an dan untuk selama beberapa tahun Rembau serta negeri-negeri di sekitarnya tidak mempunyai kedua defacto atau dejure. Pada masa kekosongan ini tibanya Raja Adil. Semasa Raja Adil berada di Rembau beliau tidak menggunakan gelaran Yamtuan Besar tetapi Yamtuan Muda Rembau (Khoo Kay Kim, 1990:9). Apabila Raja Adil mati pada tahun 1778, tempatnya telah diambil alih oleh puteranya Raja Adil, juga sebagai Yamtuan Muda. Kekosongan jawatan Yamtuan Besar ini berlaku sehingga penghujung abad ke lapan belas kerana pada pertengahan abad berkenaan sehingga Belanda menewaskan Raja Haji di Teluk Ketapang (1784) Rembau hampir dikuasa oleh orang Bugis. Kerana keadaan politik pada penghujung abad ke lapan belas banyak berubah, boleh jadi, pada masa itulah dihidupkan kembali jawatan Yamtuan Besar dan gelaran itu diserahkan (16) kepada Raja Hitam, ipar Raja Adil yang mati pada tahun 1795/6 (Khoo Kay Kim, 1990:9).

3.2 Puncak Keagungan Kerajaan Melayu Rembau

Apa yang penting mengenai huraian di atas dari segi penulisan ini adalah: dengan hadirnya Raja Melewar di awal tahun 1700an sebagai Yamtuan Besar Rembau dan Negeri Sembilan struktur dan organisasi sosio-politik Rembau dan Negeri Sembilan lengkap. Ia lengkap dari segi tuntutan sistem politik di rantau Minangkabau dan juga dari keperluan sosial Adat Perpatih.

Rembau dan Negeri Sembilannya mengambil masa kurang lebih enam ratus tahun untuk muncul sebagai sebuah kerajaan persekutuan. Untuk sampai ke tahap ini Negeri Sembilan terpaksa berkembang melalui tiga peringkat utama iaitu:

- i) Pembentukan petempatan sementara (abad ke 11/12) sehingga wujud atau terdiri sebuah kerajaan di abad ke 16 (1540).
- ii) Perlembagaan dan pembangunan sistem sosial dan sistem politik Adat Perpatih sebagai rantau Minangkabau di Semenanjung Tanah Melayu.
- iii) Pembentukan persekutuan Negeri Sembilan dengan Rembau sebagai pusat sosio-politiko-budayanya. Peringkat ini mengambil masa tidak kurang dari tiga puluh tahun, iaitu sejak kedatangan Raja Ibrahim (1573) sehingga terlantiknya Raja Melewar sebagai Raja/Yamtuan Besar (1700).

Namun, untuk lebih kurang lima puluh tahun selepas kematian Raja Melewar, iaitu dari tahun 1740an sehingga 1795/6 kestabilan sosio-politik Rembau dan Negeri Sembilan terancam semula kerana kehadiran putera-putera Bugis. Keadaan pulih apabila Raja Hitam ditabalkan sebagai Yamtuan Besar pada tahun 1795.

Bagi Kerajaan Rembau, keadaan tidaklah setenang yang diharapkan. Pada tahun 1798 institusi (17) Yamtuan Muda terpaksa dihidupkan kembali. Penghulu Rembau, Datuk Lela Maharaja Kosil (1795 - 1812) telah menyerahkan sebahagian daripada Rembau Baroh, iaitu Luak Tampin hari ini, kepada Yamtuan Muda Raja Asil (1798 - (18) 1812). Pertelingkahan antara Penghulu dengan Yamtuan Muda Rembau sampai ke mercunya pada tahun 1819.

Pada tahun tersebut Penghulu Rembau, Datuk Kosil telah meninggal dunia. Semasa proses pemilihan bakal penghulu dilaksanakan, Yamtuan (19) Muda ketika itu, Raja Ali (1812-1832) telah melibatkan diri; suatu perbuatan yang, kalau mengikut Braddell, dianggap sebagai

"suatu pembaharuan lagi sejak perlantikan Yamtuan Muda" (1856:221). Kemudian, di sekitar awal tahun 1830an, Yamtuan Muda telah melibatkan Rembau dalam antara Naning dengan Inggeris (1831 - 32). Pada awal perang Kerajaan Rembau telah membantu Naning, tetapi kemudian Raja Ali berpihak pula kepada Inggeris. Perbuatan belot Raja Ali ini telah menjadi salah satu dari faktor penentu yang membawa kepada kekalahan dan seterusnya tertakluknya Naning oleh Inggeris.

Titik terakhir yang membawa kepada konfrantasi terbuka antara Penghulu dan Yamtuan Muda Rembau adalah Raja Ali dan pengikutnya cuba membunuh Penghulu Rembau. Akibat dari perbuatan serong Raja Ali ini, perang saudara telah meletus. Perang ini tamat dengan campurtangan Inggeris, Inggeris telah memerintahkan Yamtuan Muda Rembau menjadi pemerintah di Tampin dengan gelaran Tunku Besar (Sheppard, 1965:37). Dengan itu, keamanan tercapai, gelaran Yamtuan Muda Rembau dihapuskan; tetapi terpaksa mengorbankan sebahagian daripada wilayahnya.

Di masa awal pertelingkahan ini, struktur politik dalaman Rembau juga mengalami pembaharuan. Dalam tahun 1831 empat orang (20) Datuk Lembaga Rembau Darat diserap masuk ke dalam majlis pentadbiran Kerajaan Rembau (Hervey, 1884:225). Sebelum itu kuasa mereka adalah terhad kepada hal-hal yang berkaitan dengan suku masing-masing sahaja. Hal ehwal luar dan dalam dan membuat polisi Kerajaan Rembau adalah di tangan Penghulu dan Lembaga (21) tiang Balai (Baruh). Mulai tarikh itu ahli Lembaga Tiang Balai menjadi lapan orang. Mereka dikenali sebagai Lembaga Yang Berlapan atau Tulang Urat di samping mengekalkan nama asal: Lembaga Tiang Balai.

Fasa terakhir bahagian pertama period ini (1831 - 1883) adalah zaman kucar kacir dalam arena politik Rembau. Antara peristiwa utama yang berlaku adalah:

- i) Antara tahun 1831 hingga 1865, seperti yang baru diuraikan di atas adalah 'pergaduhan' antara penghulu dan lembaganya di satu pihak, dengan Yamtuan Muda di pihak lain.

- ii) Dalam tahun 1872 - 73 suatu 'perang saudara' telah meletus hasil dari perebutan pusaka Penghulu, iaitu antara pengikut Haji Mustapha dengan pengikut Haji Sahil. Konflik ini berakhir dengan terpilihnya Haji Sahil sebagai Penghulu dalam tahun 1873 (Thio, 1969:9).

Haji Sahil, semasa pemerintahannya (1873 - 1883) terpaksa berperang dengan Inggeris berkaitan dengan hal perdagangan di Sungai Linggi (Khoo Kay Kim, 1972:148-50). Konflik ini 'memaksa' Inggeris mencampuri politik Rembau dengan menggunakan kekerasan senjata, dan akhirnya, pada 27 Mac 1883, Sir Frederick Weld, Gabenor Negeri Selat telah memecat Haji Sahil dan 'meletakkan' Serun bin Bidin sebagai Penghulu Rembau.

Pemecatan Haji Sahil dan perlantikan Serun (1883 - 1905) sebagai Penghulu adalah suatu titik tanda dalam sejarah politik dan sosial Rembau. Ini merupakan langkah pertama terhadap penglibatan Inggeris dalam hal ehwal Rembau.

3.3 Zaman Penjajahan

Bahagian kedua zaman orang Eropah ini bermula dengan kehilangan kuasa jurudikal Penghulu dan Lembaga ke atas hal-hal sivil dan jenayah, dan menyerahkan soalan hasil negeri kepada Inggeris. Dalam kes Rembau, Inggeris sebaliknya bersetuju membayar pemimpin-pemimpin politik adat sepertiga dari keseluruhan hasil mahsul Rembau. Persetujuan ini tercapai melalui perjanjian tahun 1887. Kesahihan perjanjian ini adalah diragukan kerana pada dokumen perjanjian itu tidak terdapat sebarang tanda atau tandatangan yang diturunkan oleh Penghulu dan Lembaga Rembau (Norhalim bin Hj. Ibrahim, 1976:63).

Dalam tahun 1889 Rembau bergabung dengan Johol dan Tampin yang telahpun bernaong di bawah Inggeris, membentuk suatu persekutuan (Maxwell dan Gibson, 1924:51-52). Sungai Ujong dan

Jelevu yang telah terlebih dahulu bernaong di bawah Inggeris menganggotai persekutuan tersebut dalam tahun 1895 untuk membentuk Persekutuan Negeri Sembilan. Tiga tahun kemudian, Penghulu-Penghulu Sungai Ujong, Jelevu, Johol dan Rembau bersetuju mengakui Tuanku Muhammad (1889 - 1993), Yamtuan Seri Menanti sebagai Yang Dipertuan Besar Negeri Sembilan.

Dengan perjanjian itu, Rembau yang pernah mengecap keistimewaan sebagai pusat sosio-politik dan budaya atau Adat Perpatih di Semenanjung Tanah Melayu, dengan jajahannya sendiri, hanya menjadi sebuah sub-daerah (daerahnya Tampin) dalam persekutuan baru itu.

Penguatkuasaan pemerintahan kolonial Inggeris ke atas Negeri Sembilan yang bermula pada tahun 1874 (Sungai Ujong) telah merubah secara kritikal organisasi politik dan sosial masyarakat Adat Perpatih ini.

3.3.1 Perubahan Sosio-Politik

Inggeris telah menghakis dan menolak keberfungsian bentuk perwakilan politik berdasarkan kekeluargaan yang mencirikan kehidupan politik tradisional. Kuasa-kuasa dan kewibawaan Penghulu (di zaman Inggeris dipanggil Undang), Datuk-Datuk Lembaga dan ketua-ketua adat yang lain (Buapak, Besar dan Kadim) telah dibayangi, dan diganti dengan jentera pentadbiran baru - residen dan pegawai daerah. Pegawai daerah bekerja melalui penghulu mukim, setiap mukim dipecahkan kepada beberapa buah kampung yang setiap satunya diketuai oleh ketua kampung.

Kuasa penghulu mukim bertambah dengan meningkatkan tanggungjawab pentadbiran kolonial. Pejabat penghulu mukim yang terletak di bahagian bawah dalam hirarki pentadbiran penjajah telah menjadi penting dalam pentadbiran desa.

Penghulu mukim adalah orang perantaraan antara kuasa-kuasa kerajaan sekular, keagamaan dan ketua-ketua adat di Negeri Sembilan. Dalam kes ini, apa yang hendak saya utarakan di sini adalah tidak seorangpun pegawai adat (baik Lembaga, Buapak ataupun Besar) yang dilantik atau diserapkan ke dalam jentera pentadbiran Inggeris - walaupun ke peringkat yang

paling terendah, Ketua kampung. Mereka tidak terlibat langsung dalam sebarang hal pentadbiran melainkan yang berkaitan dengan adat. Malahan dalam soal adatnya Inggeris masih menekankan kekuasaannya. Justeru itu, menjelang tahun 1889, dengan Rembau sebagai wilayah Negeri Sembilan terakhir dinaongi Inggeris, wujudlah di Negeri Sembilan suatu sistem

politik dualistik. Sistem dualistik ini dicirikan oleh suatu politik kesukuan yang telah dieriseratkan meskipun secara formal tidak terjejas di satu pihak, dan yang tertakluk kepada hegemoni peralatan birokratik yang berkuasa tinggi dan yang semakin dipusatkan dengan tujuan memelihara peraturan dan undang-undang, pengutipan hasil, dan pembangunan cara hidup kapitalistik secara umum, di pihak yang lain.

3.3.2 Perubahan Demokrasi

Kemasukan Inggeris juga telah merubah pola kependudukan Negeri Sembilan. Di Rembau misalnya, sebelum tahun 1889 bilangan bangsa asing, terutama sekali orang China, yang tinggal di situ sangat sedikit, meskipun ada yang datang sebagai peniaga damar dan rotan (Khoo Kay Kim, 1972:152). Ada beberapa orang China yang cuba memperkenalkan penanaman ubi kayu secara besar-besaran di akhir 1870an dan di awal 1880an (Sadka, 1968:345) namun mereka telah dipaksa keluar oleh orang-orang Melayu setempat (Skinner, 1878:229). Selepas kemasukan Inggeris orang-orang China telah masuk dengan lebih bebas dan

ramai yang membuat petempatan di Negeri Sembilan. Kebanyakan dari mereka adalah pekereja-pekerja yang diimpot Inggeris, mula-mula sebagai buruh kemudian sebagai peniaga.

Di samping orang China, orang India juga sampai ke Negeri Sembilan. Tidak seperti orang China, mereka diperkenalkan sebagai buruh oleh Inggeris apabila mereka membuka ladang-ladang besar di sekitar tahun 1910an. Orang India tidak bertanding dengan orang Melayu kerana mereka datang khusus untuk bekerja di estet kepunyaan Inggeris dan akhirnya mereka terasing dari penduduk setempat. Perubahan demografi ini, yang secara disebabkan oleh polisi Inggeris yang sangat bergantung kepada pekerja impot, tidak memisahkan orang Melayu di Negeri Sembilan dengan cara pengeluaran mereka secara keseluruhan; dan sistem-sistem ekonomi asli dan sosial mereka juga tidak dimansuhkan secara total tetapi sebaliknya terus berfungsi di sepanjang period dominasi kolonial.

3.3.3 Pendidikan Sekular

Di samping mewujudkan suatu sistem pentadbiran birokratik yang kompleks Inggeris juga memperkenalkan sekolah-sekolah sekular di Negeri Sembilan. Atas sebab-sebab tertentu proses sosiolisasi menjadi lebih kompleks.

Berkaitan dengan perkara ini, apa yang harus diingat ialah Adat Perpatih itu bukan sahaja merupakan suatu set amalan sosial, budaya dan ekonomi tetapi juga adalah suatu tradisi

intelektual. Adat itu, meskipun tidak ditulis dan sebahagian besar tidak dikodifikasi sehingga kedatangan tamaddun Islam, perkembangan dan penurunan gagasan pengetahuan ini adalah penting. Saya berpendapat proses ini adalah suatu pendidikan indigenous walaupun ia kekal dengan ciri informal dan lisan. Justeru itu, apabila Inggeris memperkenalkan sistem pendidikan sekular, pendidikan bukan hanya lagi suatu pemindahan parental mengenai kemahiran tradisi dan nilai-nilai adat; tetapi pendidikan itu sendiri telah menjadi setengah terpisah dari konteks keluarga dan ditumpukan terutamanya kepada penguntukan, pemilihan dan melatih individu-individu supaya berperanan dalam suatu masyarakat yang sedang berubah. Di Negeri Sembilan, dengan kedatangan Inggeris, dua bentuk pendidikan dapat dikenalpasti: satu informal (agama) dan yang lagi satu formal (pendidikan sekular). Bentuk pendidikan terakhir ini telah mewujudkan beberapa jenis institusi yang berbeza, iaitu sekolah Melayu, sekolah Inggeris dan sekolah pertukangan (Norhalim bin Hj. Ibrahim, 1976:177).

Mengikut Sutcliffe, kebanyakan ketua adat Negeri Sembilan gagal untuk mendapatkan pendidikan untuk anak-anak mereka (1956:163), selain di Rembau (Norhalim bin Hj. Ibrahim, 1976:184). Di Rembau ketua-ketua adatlah yang sangat berminat dalam mendapatkan pendidikan sekular; dan dengan itu, sekolah pertama telah didirikan pada tahun 1893. Penghulu/Undang Rembau, walau bagaimanapun tidak berpuashati dengan keadaan sekolah yang ada kerana

kesemuanya adalah untuk kanak-kanak lelaki. Dengan itu, pada 1897 beliau telah memohon grant untuk mendirikan sebuah sekolah khas untuk kanak-kanak perempuan (Annual Report of D.O. Tampin for 1897, para 77). Permohonan Penghulu/Undang Rembau ini tidak dapt dipenuhi kerana Inggeris berpendapat perkembangan tersebut adalah pramasa untuk Negeri Sembilan, malahan untuk Negeri-Negeri Bersekutu, kerana secara rasmi diragui sama ada masyarakat boleh memberikan sebarang kepentingan kepada faedah pendidikan kanak-kanak perempuan (sutcliffe, 1956:182).

Pada tahun 1910 di Rembau telah terdiri empat buah sekolah Melayu. Tahun ini juga menampakkan satu lagi perubahan kerana pada tahun berkenaan kumpulan pertama kanak-kanak perempuan telah diberi peluang dan tempat untuk belajar di beberapa buah sekolah di daerah itu. Menjelang tahun 1920 bilangan sekolah telah bertambah menjadi tiga belas dengan beberapa buah sekolah khas untuk kanak-kanak perempuan.

Kemasukan pendidikan moden yang disimpulkan oleh Ketua Setiausaha Negeri-Negeri Bersekutu sebagai : ... menjadikan anak-anak nelayan dan petani nelayan-nelayan atau petani-petani yang lebih cerdas dari bapanya" (Annual Report, Federated Malay States, 1920:13), saya rasa memainkan peranan signifikan dalam merubah Adat Perpatih. Pandangan saya ini sejajar dengan dapatan Lewis yang membuat kajilidikan di Inas, yang berkesimpulan: " ... kuasa paling efektif untuk perubahan

- dan modenisasi adalah sistem pendidikan sekular anjuran kerajaan" (1962:315).

Sekolah Melayu, walaupun bukan suatu institusi efisien, yakni ia sangat sedikit memberikan perubahan yang dijanjikan, namun oleh kerana keadaan semulajadinya memperkenalkan teknik-teknik praktikal untuk menghadapi perubahan telah meletakkan asas untuk pemikiran progressif. Dan pemikiran progressif ini telah membuahkan hasil apabila orang Melayu secara mendadak disedarkan oleh penaklukan Jepun di sekitar tahun 1940an, walaupun di pihak lain pemikiran progressif ini juga secara tidak langsung telah memperkecilkan sistem-sistem nilai dan moral adat.

3.3.4 Perubahan Hak Milik Tanah

Satu lagi perubahan penting yang dibawa Inggeris adalah berkaitan dengan hakmilik tanah. Sehingga tahun 1900 sikap orang Eropah terhadap tanah memberi kesan yang sedikit ke atas sistem tenure tanah orang-orang Melayu Negeri Sembilan.

Dalam keadaan tradisi secara umum di Negeri Sembilan terdapat tiga jenis tanah: tanah waris, tanah suku dan tanah tebus. Tanah waris boleh diteroka oleh ahli masyarakat setempat dengan isbat lembaga dan Penghulu/Undang. Sistem ini dengan caranya tersendiri memberikan perimbangan kuasa ekonomi di kalangan suku-suku.

Apabila Inggeris memasuki Negeri Sembilan mereka mempunyai konsep yang berlainan mengenai tanah waris. Mereka menganggap semua tanah yang tidak diusahakan adalah di bawah kategori ini dengan itu terbuka untuk dijual beli atau disewa bagi menjalankan perusahaan perlombongan bijih timah dan perladangan pertanian (Pektz, 1983:232-233). Dengan fahaman ini, Inggeris mula mendirikan suatu sistem pertanian ladang secara besar-besaran ke atas 'tanah waris'. Firma-firma British turut serta dan akibatnya perusahaan perlombongan timah menjadi semakin meluas. Mereka, untuk mendapatkan buruh bagi perusahaan-perusahaan kapitalis ini telah menggalakkan imigrasi lebih ramai pekerja-pekerja asing dan menggaji mereka sebagai pekerja-pekerja upahan atau orang gaji berkontrak. Keadaan ini membawa kepada pengwujudan penduduk multi-etnik di Negeri Sembilan.

Peladang-peladang - kebanyakannya orang Inggeris dan beberapa orang China - telah meluaskan estet-estet dan kadangkala memohon membeli jaluran tanah kampung, malahan tanah sawah untuk tujuan konsolidasi. Ini akan menimbulkan masalah yang serius. Situasi begini mungkin akan merangsang orang Melayu pemilik tanah untuk menjualkannya kepada bangsa asing. Perbuatan demikian, jika berluasa akan mengakibatkan orang Melayu kehilangan sumber penghidupannya (Hooker, 1972:168). Di samping itu, orang Inggeris secara amnya menentang keseluruhan sistem hakmilik tanah Negeri Sembilan yang memberikan hak kepada wanita. Mereka dengan terang

memandang suatu sistem di mana hak-hak provisional ke atas tanah diserahkan kepada wanita dengan mengenepikan orang lelaki sebagai sesuatu yang tidak natural (Peletz, 1983:235).

Dengan itu, pada tahun 1909 Kerajaan British telah campurtangan secara langsung dalam amalan pewarisan hakmilik tanah Negeri Sembilan dan meluluskan

Customary Tenure Enactment. Inti pati enactment ini adalah: kesemua hakmilik orang Melayu ke atas tanah sawah dan kawasan tempat tinggal harus didaftarkan di bawah nama pemilik individu.

Pengimplimentasian enakmen ini adalah merupakan suatu perubahan radikal. Ia membolehkan kerajaan mengenepikan tanah-tanah tertentu, terutama sekali tetapi tidak semata-mata, yang sesuai untuk penanaman padi dan untuk kegunaan mereka. Orang Inggeris juga menggalakkan orang lelaki Melayu membeli dan memiliki tanah sendiri, di mana mereka boleh menanam tanaman kontan. Sehubungan dengan ini, polisi Inggeris ini mempunyai kesan yang tidak pernah terjadi sebelumnya, iaitu seorang lelaki mempunyai hak tanah tersendiri, bebas dari pengaruh isteri dan saudara-mara (sesuku). Akhir sekali tetapi bukan yang penyudah ialah enakmen ini telah menghapuskan hak Penghulu/Undang dan Lembaga ke atas tanah waris (tanah kosong) di Luak dan suku masing-masing.

Akta tanah adat ini telah melalui proses perkembangan dan perubahan. Akta 1909 telah

diganti dalam tahun 1926 yang dalam 1930 telah pula diperebaiki dan dipinda. Hasilnya ialah enakmen-enakmen dan pindaan-pindaan inilah yang menjadi sebahagian besar dari isi akta yang hari ini dikenali sebagai Chapter 215 atau ringkasnya Cap 215. Penggubalan, perubahan serta pindaan yang dilakukan ke atas akta ini adalah, antara lain untuk menggalakkan individu dan bukannya kumpulan kelompok kekeluargaan untuk menguasai tanah yang masih belum dikategorikan sebagai tanah adat.

Perlembagaan ini selanjutnya telah memberi kesan yang kuat ke atas kedinamikan ketuanan tanah di kalangan orang Melayu Negeri Sembilan. Kuasa ekonomi dan politik suku dan terutama sekali, mungkin kuasa wanita telah menjadi semakin lemah dengan kehilangan sebahagian besar dari harta produktif (tanah tak bertebus) mereka. Di samping itu, injap keselamatan dalam bentuk pembukaan kawasan hutan dara baru (apabila penduduk suku bertambah atau untuk keperluan-keperluan tertentu keluarga-keluarga dalam suku berubah) telah dihapuskan. Pengecilan tanah yang drastik ini dan berlanjutnya penyekatan ke atas sumber yang ada pada suatu suku telah menimbulkan tekanan yang agak besar dan membawa kepada bertambahnya keadaan tidak seimbang dalam pemilikan tanah. Setakat yang tertentu, keadaan ini telah 'mamaksa' ahli-ahli suku untuk berhijrah keluar mencari pekerjaan.

3.3.5 Perubahan Terakhir (?)

Menjelang awal abad kedua puluh kuasa yang ada pada Penghulu/Undang dan Lembaga sangat sedikit; itupun dalam aspek-aspek tertentu yang berkaitan dengan undang-undang adat seperti pewarisan tanah pusaka adat. Sebaliknya kuasa Inggeris adalah lebih jelas, malahan lebih kuat dari pengaruh

Yang Dipertuan Besar. Misalnya dalam tahun 1905, di Rembau telah meletus perebutan jawatan pusaka undang. Yang Dipertuan Besar Tuanku Muhammad (1883 - 1933) atas inisiatifnya sendiri telah melantik Bidin sebagai Undang baru. Perlantikan beliau ini telah ditolak oleh ketua-ketua adat Rembau yang sebaliknya telah melantik Haji Sulong. Perlantikan Haji Sulong ini telah dipersetujui dan diizinkan oleh Gabenor Inggeris di Singapore. Walau bagaimanapun, Haji Sulong telah dipaksa turun dari jabatan pusaka itu atau 'dipecat oleh orang Inggeris' (iaitu kuasa yang mengizinkan perlantikannya) kerana sikap permusuhan terhadap orang Inggeris dan ketua-ketua adat yang 'bersetuju' dengan Inggeris (Norhalim Hj. Ibrahim, 1976:67-68).

Inggeris, setelah memecat Haji Sulong telah 'melantik' Abdullah bin Dahan (1922-1938). Beliau adalah undang yang paling terkemuka di kalangan undang-undang di Luak Rembau dan mungkin di Luak-Luak adat yang lain di abad dua puluh kerana peranan yang dimainkannya serta pengaruhnya, bukan sahaja di

peringkat lokal tetapi juga negara. Beliau telah cuba merubah kedudukan ketua-ketua adat di Rembau, terutama sekali datuk-datuk Lembaga dengan menyerapkan mereka ke dalam struktur pentadbiran baru. Untuk tujuan ini beliau telah melantik beberapa orang datuk Lembaga yang berpendidikan dan mempunyai kekuatan peribadi serta kemungkinan sebagai pemimpin menjadi penghulu mukim. Dengan demikian diharap mereka akan dapat kembali sebahagian dari kuasa yang telah dilupuskan oleh sistem pentadbiran penjajah (Abas, 1974:18). Di masa yang sama beliau telah menasihati datuk-datuk Lembaga yang lain untuk merubah cara hidup mereka, terutama sekali penglibatan mereka dalam rasuah semasa menjalankan undang-undang adat; jikalau tidak mereka dinasihatkan supaya meletakkan jawatan. Malahan, pada suatu masa, beliau pernah mengamcam untuk membubarkan kelompok kekeluargaan suku (Abas, 1974:18). Walau bagaimanapun usaha beliau ini tidak membuahkan hasil kerana di zaman akhir pemerintahannya datuk-datuk Lembaga yang 'dijadikan' penghulu mukim telah ditukar semula dengan 'orang bukan adat' oleh penjajah.

Dalam tahun 1927 beliau telah meminta guru-guru agama dan orang-orang berpendidikan di Rembau supaya mempengaruhi dan memujuk datuk-datuk Lembaga dan generasi muda untuk 'mengenepikan' adat, terutama sekali aspek pewarisan tanah. Dalam usaha ini, beliau telah mendapat sokolngan dari seorang tokoh agama terkenal, Haji Mohamad Said, seorang orang

semenda di Kampung Sawah Raja. Usaha ini telah menemui 'kegagalan' dan Haji Mohamad Said telah berpindah ke Seremban di sungai Ujong. Di Sungai Ujong, walau bagaimanapun Haji Mohamad Said telah berjaya mempengaruhi undang dan rakyat Sungai Ujong untuk mengikut pandangannya. Justeru itu, Sungai Ujong aturan adat berkait dengan tanah pusaka adat dan tanah pusaka adat itu sendiri telah dimansuhkan.

Abdullah juga telah cuba menghapuskan prinsip eksogami suku dan memujuk rakyat Rembau agar mengikut aturan Islam dalam mencari pemilihan jodoh. Walau bagaimanapun percubaan ini juga telah menemui kegagalan melainkan pujukannya untuk menerima suatu rersolusi yang berkaitan denggan harta carian iaitu ianya harus dipindahkan mengikut undang-undang Islam.

Satu lagi pembangunan yang diperkenalkannya dan masih kekal sehingga ke hari ini adalah pembentukan tabung waris Rembau. Tujuan tabungan ini adalah untuk membantu anak-anak Rembau yang berkebolehan tetapi tidak berkemampuan untuk melanjutkan pelajaran. Setakat ini ramai anak-anak Rembau telah berjaya mencapai tahap kejayaan yang tinggi hasil dari bantuan tabung ini.

4. KEPENDUDUKAN JEPUN

Tidak banyak yang dapat diperkatakan mengenai sejarah terutama sejarah adat Negeri Sembilan yang melibatkan zaman ini. Antara sebab utamanya ialah sangat kurang, malahan sejauh pengetahuan saya tidak ada lagi sebarang penyeldidikan intensif yang membicarakan sejarah Negeri Sembilan dalam kerangka jangka waktu ini.

Dokumen-dokumen dan rekod-rekod yang berkaitan dengan zaman ini tidak banyak yang diperolehi. Malahan pejabat Undang Rembau (Balai Undang) yang mula menfailkan kesemua dokumen berkaitan dengan pentadbiran adat Rembau sejak akhir tahun 1920an (semasa pentadbiran Datuk Sedia Raja Abdullah Dahan; dan mungkin satu-satunya pejabat Undang di Negeri Sembilan yang mempunyai sistem fail sebelum penaklukan Jepun) tidak mempunyai sebarang rekod penting mengenai zaman ini. Fail-fail yang dibuka pada zaman ini hanya yang berkaitan dengan perlantikan baru ketua-ketua adat. Berhubung dengan ini, kita hanya boleh mengandaikan bahawa tidak ada sebarang perubahan penting dalam perkembangan sejarah adat. Adat mungkin telah berjalan sebagaimana ia ditadbirkan di masa-masa sebelumnya.

Kita boleh mengandaikan sedemikian, tetapi beberapa persoalan yang berkaitan dengan adat dan sejarah harus dicari jawapan. Berkaitan dengan ini mungkin Luak Rembau mempunyai keistimewaan tersendiri kerana beberapa tahun sebelum Datuk Sedia Raja Abdullah dipecat beliau telah melawat negara Jepun.

Semasa di sana beliau telah berkesempatan menemui Maharaja Jepun di masa mana beliau telah dianugerah sesalin pakaian dan sebuah 'cop'. Pertemuan di antara kedua pemimpin ini telah berlaku antara empat mata sahaja, dan dengan itu, apa yang mereka bincangkan, sehingga ini masih menjadi mistri. Justeru ini, pertemuan ini sendiri menimbulkan beberapa persoalan yang perlu jawapan. Datuk Abdullah telah meninggal dunia sebelum kedatangan Jepun ke Tanah melayu.

Persoalan-persoalan lain juga harus dicari jawapan. Antara persoalan itu adalah:

- i) Bagaimanakah rupa bentuk antara pemimpin-pemimpin adat dengan pegawai-pegawai tentera Jepun, baik di peringkat Luak mahupun di peringkat Negeri?
- ii) Pada peringkat manakah adat berfungsi secara efektif - peringkat kampung, Luak atau Negeri?
- iii) Adakah ketua-ketua adat 'digunakan' dalam menjalankan pentadbiran harian Luak atau Negeri?
- iv) Dan, adakah telah berlaku penyusunan semula struktur dan organisasi adat guna menyesuaikan dengan pentadbiran harian kuasa Jepun?

Persoalan-persoalan yang ternyata di atas dan persoalan-persoalan lain harus dicari Jepun, jikalau tidak akan berlaku suatu kekosongan dalam sejarah sosial, budaya dan politik Negeri Sembilan.

Satu perkara dapat diutarakan mengenai penaklukan ini. Kependudukan Jepun, walaupun pendek (tiga setengah tahun) adalah suatu pengalaman traumatik bagi orang Melayu, bukan sahaja di Negeri Sembilan tetapi juga di wilayah-wilayah lain di Semenanjung Tanah Melayu. Ia memberikan sejenis kematangan kepada orang Melayu yang membolehkan mereka menentang pengkolonilisasian semula negeri ini apabila Inggeris balik dalam tahun 1945.

5. PERIOD KEMERDEKAAN

Tentera Jepun telah berundur daripada Semenanjung Tanah Melayu dalam tahun 1945. Sebagai disebut di atas, kependudukan Jepun telah membangunkan orang Melayu dan menyedarkan mereka bahawa tuan Inggeris mereka tidaklah se'baik' dan se'pemurah' yang disangka. Dari itu, apabila British Military Administration (BMA) yang

mengambilalih kuasa dari tentera Jepun cuba memperkenalkan konsep Malayan Union orang Melayu telah bangun menentanginya. Orang-orang telah bersatu dan kesatuan ini beberapa tahun kemudian telah menjadi satu parti politik Melayu yang kuat, dikenali sebagai United Malay National Organisation atau lebih terkenal dengan UMNO sahaja. UMNO telah menubuhkan cawangan dan bahagian di merata Semenanjung Tanah Melayu, termasuk Negeri Sembilan.

Dengan adanya keadaan ini, tahun-tahun antara 1945 dan 1957 itu bagi saya, adalah fasa pertama period kemerdekaan. Zaman berkenaan ini adalah kritikal dalam ertikata di masa tersebutlah asas kemerdekaan mula terbina. Dalam masa yang sama itu juga adat sebagai ^{su} tradisi dan sebagai suatu kerangkakerja yang menentukan pelakuan ahlinya telah menjadi lebih cair.

Penubuhan UMNO di Negeri Sembilan, secara tidak langsung telah mewujudkan satu lagi jenis pemimpin di kalangan orang-orang Melayu selain dari dua (adat dan birokratik) yang sedia ada. Pemimpin-pemimpin UMNO dapat dianggap sebagai satu jenis pemimpin di kalangan orang-orang Melayu Negeri Sembilan kerana sejak penubuhannya sehingga kini, UMNO merupakan satu-satunya parti politik utama di Negeri Sembilan. Di masa awal penubuhannya, pada peringkat daerah ketua UMNO bahagian dianggap sebagai setaraf dengan penghulu mukim dan ketua cawang sama seperti ketua kampung. Setiap cawangan UMNO mempunyai berbagai unit seperti kaum ibu dan pemuda. Setiap unit itu mempunyai ketua masing-masing. Beberapa orang dari pemimpin UMNO di Negeri Sembilan, misalnya di Kuala Pilah adalah juga pemimpin-pemimpin adat. Tetapi di Rembau, ketua-ketua adat tidak terlibat dalam kepimpinan politik.

Di awal penubuhannya, sama juga seperti orang Inggeris, UMNO, sekurang-kurangnya tidak secara terbuka, tidak sangat menunjukkan minat terhadap adat. Tetapi pada akhir tahun 1950 Barisan Agama UMNO Rembau telah menimbulkan isu sensitif berkaitan dengan adat dan Islam; dan persoalan kemulutnya adalah berkisar mengenai pewarisan harta pusaka. Konflik ini telah menjadi polemik terbuka dalam bulan Februari 1951 isu berkenaan diterbitkan dalam akhbar harian, Utusan Melayu. Kontroversi ini berjalan untuk hampir setahun dan akhirnya surut begitu sahaja. Konflik ini pada keseluruhannya tidak membawa sebarang perubahanpenting (22) kepada struktur dan organisasi adat.

Menjelang akhir pertama period ini, minda orang Melayu, termasuk Negeri Sembilan, adalah tertumpu kepada perjuangan mencapai kemerdekaan. Pada tahun 1955 seluruh negara sedang menghadapi pilihan raya pertama dan dengan itu UMNO di Negeri Sembilan tidak ada masa untuk memikirkan tentang adat. Walau bagaimanapun, di masa period peralihan ini suatu kelompok pemimpin baru telah muncul dalam kehidupan harian rakyat Negeri Sembilan. Mereka ini adalah teridri dari individu yang dilantik Inggeris sebagai 'wakilrakyat'. sama ada di peringkat majlis persekutuan atau majlis negeriselepas pilihanraya 1955, sebahagian daripada mereka yang duduk dalam majlis-majlis berkenaan adalah wakilrakyat yang dipilih dan dengan itu mempunyai aturan kuasa yang berlainan dari wakil lantikan Inggeris. Mereka ini adalah jenis pemimpin baru yang akan memberi kesan berbeza kepada organisasi adat.

6. ZAMAN KEMERDEKAAN

Persekutuan Tanah Melayu mencapai kemerdekaannya pada tahun 1957. Mulai dari tarikh itu, Negeri Sembilan seperti juga negeri-negeri Melayu lain tidak lagi mempunyai British Residen. Walau bagaimanapun, struktur pentadbiran tidak banyak berubah; personel yang dahulunya Inggeris diganti dengan orang setempat. Pada waktu yang sama pemimpin-pemimpin politik menjadi semakin penting dalam senario tempatan. Mereka datang daripada dua peringkat, ahli parlimen dan ahli dewan negeri. Di samping mereka terdapat pula ketua-ketua parti di peringkat bahagian dan cawangan. Dengan itu, sehingga ke hari ini terdapat tiga jenis pemimpin utama di Negeri Sembilan - birokratik, politik dan adat. Kesemua jenis pemimpin tersebut adalah pemimpin formal, dan di antara mereka, pemimpin-pemimpin birokratik dan politik adalah di pandang tinggi oleh orang-orang Melayu setempat.

6.1 Konflik Adat

Sejak mencapai kemerdekaan sehingga sekarang ini terdapat berbagai konflik adat yang berlaku di Negeri Sembilan. Secara keseluruhannya ia dapat dikumpulkan kepada dua jenis - konflik dalaman dan konflik luaran.

6.1.1 Konflik Dalaman

Konflik dalaman bermaksud pertingkalahan yang berlaku dalam sistem adat itu sendiri. Isu utama konflik kategori ini adalah mengenai mengisi kekosongan jawatan pusaka adat, dan ia dapat dibagikan kepada dua jenis berdasar satu jawatan - peringkat bawahan dan atasan.

6.1.1a Peringkat Bawahan

Konflik ini berlaku semasa pemilihan datuk-datuk Lembaga, Buapak dan Besar. Contohnya di Rembau: sejak awal 1960 sehingga akhir 1968 satu konflik telah berlaku dalam perlantikan satu pusaka Buapak bagi sebuah perut dalam satu suku. Akibatnya, untuk hampir lapan tahun perut berkenaan telah diterajui oleh dua orang Buapak pada satu masa yang sama (Norhalim bin Hj. Ibrahim, 1988:162-164). Konflik kategori ini bukan sahaja berlaku di Rembau tetapi juga di luak-luak lain di Negeri Sembilan (Ismail Ambia, 1959) hanya ia jarang dilaporkan atau mendapat (24) perhatian akhbar setempat.

6.1.1b Konflik Atasan

Konflik jenis ini melibatkan jawatan pusaka peringkat atas iaitu Penghulu atau Penghulu atau Undang dan jawatan lainyang setaraf atau hampir setaraf dengannya. Oleh sebab konflik jenis ini melibatkan status yang tinggi dalam hiraki kepimpinan adat ia mendapat publisiti yang lumayan dalam akhbar-akhbar harian setempat. Antara konflik yang timbul adalah:

- i) Di Sungai Ujong di awal tahun 1980an telah terdapat dua krisis, iaitu perlantikan Datuk Shahbandar, yang telah selesai apabila Datuk Shahbandar baru berjaya dilantik; dan perlantikan Datuk Klana Putera. Krisis terakhir ini, yang bermula dari tahun 1983 hingga ke hari belum dapat diselesaikan lagi.
- ii) Perlantikan Undang Jelebu. Krisis ini bermula dari tahun 1980 dan berlarutan sehingga tahun 1985 walaupun Undang Luak Jelebu yang baru telah dikerjankan dengan rasminya pada bulan April, 1981.
- iii) Krisis kedudukan Tunku Besar Tampin. Krisis ini telah bermula sejak tahun 1978, tetapi hanya mendapat publisiti akhbar harian di sekitar tahun 1985 dan menghilang begitu sahaja di akhir tahun 1988.
- iv) Dan, kekecohan (atas sebab tidak puas hati) semasa kerja Undang Luak Johol yang ke 12. Kecocohan ini berlaku awal tahun 1987.

6.2 Konflik Luaran

Apa yang dimaksudkan dengan konflik luaran ini ialah perselisihan faham antara pengawal adat dengan agensi luar adat, seperti konflik 1951 iaitu antara adat dan UMNO. Sejak mencapai kemerdekaan sehingga ke hari ini hanya sekali sahaja berlaku konflik bentuk ini yang mendapat liputan dari akhbar tempatan. Konflik ini berlaku di sekitar tahun 1968.

Perkembangan ekonomi Negeri Sembilan selepas sepuluh tahun merdeka adalah terlalu lembab. Dari segi pertanian Negeri Sembilan merupakan salah sebuah negeri yang mundur. Menteri Besar Negeri Sembilan pada ketika itu, semasa menyentuh soal ekonomi ini dalam suatu ceramah di Seremban telah menyatakan bahawa Kerajaan Negeri Sembilan mungkin menimbangkan semula sikapnya terhadap adat kerana pada pandangannya (Menteri Besar) kesinambungan amalan adat adalah penghalang terhadap perkembangan ekonomi negeri. Beliau memberi alasan kewujudan keadaan ini adalah disebabkan oleh kebanyakan tanah pertanian adalah terdiri dari tanah pusaka yang dipunyai oleh kaum wanita (80%); dan oleh pemecahan milik tanah akibat dari aturan pewarisan adat. Selanjutnya dia beralasan bahawa sistem kekeluargaan Adat Perpatih telah melemahkan semangat ahli lelaki masyarakat adat Negeri Sembilan.

Akibat dari ceramah ini suatu kontroversi telah timbul. Kali ini ia bukannya persoalan adat dan agama atau adat dan politik tetapi adat dengan ekonomi atau adat dengan 'dewan negeri'. Dalam kontroversi ini, walaupun ianya mempersoalkan kewibawaan adat dalam pembangunan, ketua-ketua adat tidak terlibat secara langsung. Kontroversi ini telah surut di akhir tahun berkenaan (1968) juga tanpa sebarang keputusan ataupun kebulatan mengenai persoalan sama ada adat itu faktor penyebab kemunduran ekonomi Negeri Sembilan (Norhalim bin Hj. Ibrahim, 1976:72 - 73).

6.3 Mengapa Konflik?

Persoalan: Mengapa ada konflik? Dan mengapa kadangkala ianya berlarutan untuk suatu jangkamasa yang panjang? Harus dicari jawapan. Ianya adalah penting dalam melihat (mengkaji) (?) sejarah perkembangan Adat Perpatih Negeri Sembilan.

Ada berbagai punca yang boleh menyebabkan timbulnya keadaan ini. Bagi saya, secara umum sebab-sebab itu adalah:

- i) kurang kefahaman mengenai perjalanan tradisi adat itu oleh generasi sekarang. atau/dan generasi baru telah memberikan interpretasi baru kepada adat tersebut. Keadaan ini wujud kerana sistem pendidikan sekarang, terutama sekali di zaman sebelum merdeka. Oleh sebab generasi 'lama' sekarang ini menerima pensosialisasian mereka di zaman tersebut (sebelum merdeka = zaman peralihan), ia telah memberi kesan dalam melemahkan lagi proses peninternalisasian adat kepada generasi berikutnya. Akibatnya generasi muda, sangat sedikit walaupun ada, yang dapat memahami tradisi adat itu secara menyeluruh.
- ii) pengaruh pemimpin-pemimpin politik dan juga pemimpin-pemimpin birokratik. Oleh sebab ketua-ketua adat yang berkenaan (konflik adat atasan) mempunyai status yang tinggi, mereka mungkin mahukan sokongan ketua-ketua adat berkenaan apabila berlaku sesuatu keadaan di luar dugaan. Faktor ini mempunyai persamaan dengan peristiwa di zaman awal kemasukan Inggeris iaitu mereka campurtangan dalam proses perlantikan ketua-ketua adat.
- iii) dan disebabkan oleh kepentingan diri sendiri, terutama sekali menganggap diri mereka berhak mewarisi jawatan tersebut. Oleh sebab kurang faham akan aturan yang sebenarnya maka terdapat konsep bahawa setiap ahli daripada suku pemerintah berhak mendapatkan jawatan tersebut.

6.4 Mengapa Adat Negeri Sembilan

6.4.1 Musnahnya Tulang Belakang Tradisi Adat

Sejak mencapai kemerdekaan sehingga sekarang, Malaysia kekal sebagai pengeluar bahan-bahan mentah dan hasil-hasil utama serta malahan masih merupakan pengeksport sebahagian besar dari getah, timah, sawit dan balik tropikal (Ong, 1983:428). Ini juga memberi kesan ke atas kawasan Negeri Sembilan dalam proses meluaskan penanaman getah dan sawit dan penanaman semula pekebun kecil orang Melayu di kampung-kampung. Kedua-dua komoditi ini menjadi sumber pendapatan utama mereka.

Penerokaan tanah untuk penanaman getah dan sawit juga membawa kesan lain ke atas ekonomi tempatan. Kesan yang nyata ialah ke atas sawah padi. Penghapusan hutan tempatan dan digabung pula di kawasan banjaran gunung yang menjadi tulang belakang Negeri Sembilan secara besar-besaran dan pembalakan yang tidak ekologi oleh syarikat-syarikat balak besar telah mewujudkan suatu keadaan yang hampir kekeringan dari aspek paras pemendakan dan pemakungan air yang diperlukan untuk pertanian bersawah padi. Di samping itu, pembinaan jalanraya dan beberapa jenis binaan lain, dilakukan atas nama pembangunan sering mengganggu sistem taliair untuk keperluan bersawah padi sehingga sawah menjadi kering dan tidak boleh diusahakan. Ini bermakna orang Melayu Negeri Sembilan meninggalkan perusahaan tersebut, tulang belakang tradisi masyarakat dan budaya Negeri Sembilan, dan juga aktiviti-aktiviti sampingan (Norhalim bin Hj. Ibrahim, 1971:85 - 88). Mereka telah meninggalkan kampung dan keluar mencari kerja lain seperti menjadi kakitangan kerajaan atau buruh di pekan-pekan.

6.4.2 Perusahaan dan Kesannya

Perkilangan adalah perusahaan yang paling berkembang dalam ekonomi Malaysia sejak kemerdekaan (Lim, 1982:36; Hua, 1983:160). Pembangunan industri ini mempunyai tiga kesan utama sekurang-kurangnya ke atas masyarakat Negeri Sembilan - kemudahan hidup, peluang pekerjaan dan wanita sebagai pekerja makan gaji.

6.4.2a Kemudahan Hidup

Perusahaan telah membantu mengwujudkan atau meluaskan infrastruktur fizikal dan sosial yang menghubungkan masyarakat desa dengan pusat-pusat bandar. Ini telah menambah lagi pergantungan mereka ke atas ekonomi wang dan ke atas pusat-pusat kebangsaan untuk pentadbiran.

Banyak dari kemudahan-kemudahan baru ini, seperti jalan raya, paip air, bekalan elektrik, kesihatan dan pendidikan, meskipun memberikan kemudahan-kemudahan yang diharapkan dalam penghidupan rakyat, juga telah melarat lagi ekonomi, pola-pola organisasi sosial dan nilai-nilai budaya tradisi Negeri Sembilan.

6.4.2b Peluang Pekerjaan

Satu lagi kesan pembangunan adalah bilangan kerja bergaji semakin banyak terbuka kepada orang Melayu Negeri Sembilan berbanding dengan keadaan ekonomi di zaman penjajahan. Kerja-kerja tersebut ada di kawasan industri pengeluaran dan pengangkutan, dalam jentera birokrasi yang berkembang, dan dalam bidang-bidang perkeranian,

penjualan dan perkhidmatan yang memberi sokongan kepada pembangunan perusahaan berkenaan. Akibat dari pembangunan ini telah berlaku suatu corak imigrasi massa di kalangan orang lelaki Negeri Sembilan, ke kawasan bandar dan industri seperti Kuala Lumpur, Petaling Jaya, Seremban dan malahan Singapura.

6.4.2c Wanita Sebagai Pekerja Makan Gaji

Di awal tahun 1970an suatu lagi jenis pembangunan industri baru telah mula berkembang di Malaysia. Industri ini telah mengancam untuk merubah cara hidup orang-orang Melayu yang paling fundamental. Kaliini ia melibatkan bahagian lain masyarakat - wanita. Perusahaan yang dimaksudkan di sini bukanlah perusahaan yang menghasilkan barangan untuk pasaran tempatan tetapi penghasil sama ada barang siap atau bahagian-bahagian komponen untuk diekspot kepada industri-industri besar dan pasaran di Eropah, Amerika syarikat, Jepun dan Korea. Walaupun wanita Negeri Sembilan memainkan peranan penting dalam ekonomi pengeluaran di Negeri Sembilan, untuk kali pertama dalam sejarah, wanita Negeri Sembilan terlibat secara meluas dalam sektor buruh bergaji. Pertambahan penglibatan orang-orang Melayu Negeri Sembilan dan terutama sekali wanita dalam kerja bergaji telah mengakibatkan pengorientasian semula ekonomi tempatan dari pergantungan kepada ekonomi sara hidup dan tanaman kontan (getah) kepada yang lebih bergantung kepada gaji untuk penyaraan sekurang-kurangnya sebahagian dari pendapat dasar keluarga.

6.4.3 Perubahan Pola Penggunaan

Penghijrahan keluar orang-orang Melayu Negeri Sembilan bukan sahaja disebabkan oleh pembangunan industri negara tetapi juga oleh perubahan pola-pola penggunaan. Masyarakat desa Negeri Sembilan mendapati mereka semakin

bergantung atas pendapatan tunai bukan sahaja untuk membeli barang-barang seperti televisyen, radio, malah kereta, tetapi barang-barang keperluan asas seperti makanan dan pakaian yang tidak lagi mereka hasilkan sendiri. Di samping itu telah timbul pula keperluan membayar tunai perkhidmatan-perkhidmatan tertentu seperti bekalan api, air, kesihatan, membeli buku-buku dan pakaian serangan sekolah dan untuk membayar cukai-cukai. Keperluan-keperluan tersebut dan pembayaran-pembayaran lain yang berlaku di luar dugaan menolak orang-orang Melayu Negeri Sembilan, kedua-dua lelaki dan wanita untuk mencari kerja atau lain bentuk aktiviti yang boleh mendatangkan wang, di kawasan luar daerah mereka.

6.4.4 Demokrasi Moden

Seiring dengan berkurangnya pergantungan kepada ekonomi sara diri, orang-orang Melayu Negeri Sembilan juga, sejak kemerdekaan memperlihatkan suatu kemerosotan dalam perusahaan nasib sendiri secara politik. Elite nasional Malaysia telah selanjutnya menghapuskan sistem politik tradisi Negeri Sembilan dan telah menggantikannya dengan suatu sistem perwakilan perundangan dan pentadbiran birokratik yang bersepadu di peringkat nasional tetapi kurang berkesan dan kurang demokratik di peringkat lokal.

Dalam struktur kepimpinan baru, baik ketua kampung mahupun penghulu mukim tidak berjaya mewakili wilayahnya ataupun mensepadukan rakyat ke dalam sistem pentadbiran yang lebih luas seperti mana dilakukan oleh ketua-ketua adat tradisi. Orang Negeri Sembilan juga tidak berkeupayaan untuk menentukan yang wakil-wakil mereka di parlimen atau dewan negeri sebenarnya menyuarakan perspektif mereka atau bertindak demi kepentingan mereka. Dalam sistem politik tradisi rakyat (anak buah) boleh

menentukan wakil-wakil (ketua-ketua adat) yang mereka pilih secara bebas, dengan siapa mereka boleh sering berhubungan, termasuk memperkongsikan kerja dan makanan, dan yang boleh mereka pecat, menyuarakan hasrat mereka dan kepentingan mereka. Wujudnya keadaan ini mungkin juga kehilangan sistem politik tradisi yang berdasarkan demokrasi kolektif (bulat air kerana pembetung, bulat kata kerana muafakat). Banyak daripada aktiviti sistem politik dan sosial tradisi, antara lain seperti mesyuarat, kerapatan dan berkampung tidak disepadukan dengan demokrasi moden di peringkat lokal.

6.4.5 Pendidikan Menjadi Harta Pusaka Adat

Kemerosotan ekonomi sara hidup orang Melayu Negeri Sembilan sejak masa penjajahan, yang telah 'memaksa' mereka keluar mencari pekerjaan juga telah mendorong mereka mencari pendidikan. Walaupun pendidikan menjadi suatu keperluan dalam masyarakat perindustrian bandar, selalunya untuk mendapat pekerjaan; ianya sering tidak diperlukan untukkerja itu sendiri. Kepada orang Melayu Negeri Sembilan penekanan kepada pendidik bukanlah suatu fenomena baru. Adat Perpatih, jikalau di lihat dari perbilangannya sering menekankan kepentingan ilmu, baik untuk lelaki mahupun wanita. Kemudian, apabila Islam datang, tradisi pendidikan Islam (tidak formal) di Negeri Sembilan juga membantu membentuk definisi-definisi, tujuan-tujuan dan makna-makna baru kepada pendidikan. Mungkin nilai-nilai tradisi Adat Perpatih dan Islam telah sekurang-kurangnya memperkukuhkan lagi penekanan masyarakat Negeri Sembilan semasa ke atas persekolahan.

Kepentingan pendidikan dalam kehidupan orang Melayu Negeri Sembilan sangat ketara. Malahan, apa yang lebih ketara ialah ketiadaan diskriminasi jantina

dalam pengharapan ibu bapa terhadap anak-anak berkaitan dengan persekolahan. Orang-orang Melayu Negeri Sembilan seolah-olah menganggap pendidikan itu sebagai suatu sumber baru. Ianya telah disepadukan ke dalam Sistem Adat Perpatih dan dipelakukan sebagai sumber-sumber penting adat seperti sawah, kawasan rumah dan rumah pusaka. Mereka bersikap bahawa pendidikan itu adalah sesuatu yang boleh membantu seseorang itu mengenal diri sendiri dan juga di dunia; dan dengan itu menjadikannya seorang yang lebih kaya dan luas pengalaman. Di samping pencapaian sendiri ini, pendidikan juga adalah sesuatu yang boleh mendapatkan pekerjaan dan dengan itu lebih berjaya dalam persaingan dalam keadaan ekonomi yang berubah.

Pendidikan kepada orang-orang Melayu Negeri Sembilan hari ini adalah dianggap sebagai harta pusaka baru dalam ertikata hasilyang diperolehi dari pendidikan (seperti juga harta tanah pusaka adat) harus diperkongsikan bersama sekurang-kurangnya di kalangan ahli keluarga. Dalam pengertian ini, generasi baru Negeri Sembilan, terutama sekali yang sedang mencari pendidikan tinggi, sedang secara aktif mencari interpretasi baru, bukan menolak secara total. Adat Perpatih itu; dan kemudian cuba menggunakannya dalam situasi baru. Mungkin dalam usaha mencari pengertian ini maka kita lihat di sekitar tahun 1980an berbagi seminar dan bengkel yang menyentuh berbagai aspek Adat Perpatih telah diadakan di institusi pengajian tinggi dinegara ini.

6.5 Perubahan Nilai

Kita terpaksa memperakui bahawa kemasukan nilai-nilai dan imej-imej budaya barat ke dalam masyarakat Negeri Sembilan sangat meluas. Ini berlaku melalui program-program televisyen dan radio, penerbitan dan berita, budaya popular, kemudahan mendapatkan barang-barang pengguna keluaran barat, sistem pendidikan formal dan bentuk pekerjaan baru. Sikap-sikap dan nilai-nilai baru ini telah memberi kesan kepada berbagai bidang hidup manusia, tetapi lebih nyata dalam idea-idea orang berkaitan dengan pekerjaan dan penggunaan, pendidikan dan jangkaan dalam perhubungan antara seorang dengan lain, termasuk antara lelaki dan perempuan. Malahan dalam ruanglingkup hidup tersebut tadi, idea dan pilihan orang-orang Negeri Sembilan sebanyak sedikit masih terpengaruh oleh Adat Perpatih dan oleh Islam tetapi mereka semakin dibentuk oleh nilai-nilai yang di bawa bersama oleh pembangunan ala kapitalis.

7. PENUTUP

Adat Perpatih dan budayanya telah wujud di Negeri Sembilan lebih dari enam ratus tahun. Tamaddun ini telah melalui berbagai peringkat dan period sejarah semasa mana ianya telah dipengaruhi sama ada secara lembut ataupun secara drastik. Adat Perpatih adalah sistem yang dinamik. Ia telah berubah dan akan berubah untuk menyesuaikan diri dengan masa dan tempat. Tetapi dalam proses perubahan dan penyesuaian ini tamaddun Adat Perpatih akan kehilangan keunikannya.

Sistem Adat Perpatih, walaupun tidak lagi diamalkan secara ideal oleh masyarakatnya sendiri, tetapi adalah perlu untuk mengkajinya semula. Kita harus menghargai setiap warisan kita kerana warisan inilah yang memberikan kita identiti lalu menjadi 'barang' kebanggaan kita. Malah kita boleh menimba segala ilmu, idea dan teladan daripada warisan tersebut bagi membina dan menegakkan kemajuan kerana Adat Perpatih ini, dari segi falsafah dan idea, tinggi mertabatnya dan terbukti pula kegunaan dan kemampuannya. Ketinggian falsafah serta kemampuannya mungkin telah menjadi salah satu faktor

yang membolehkan Rembau dan Negeri Sembilannya tegak menentang penjajahan, baik daripada luar (Portugis, Belanda dan untuk kurang lebih seabad, Inggeris) mahupun dari dalam (Johor dan Bugis). Dari segi ini orang-orang Rembau dan Negeri Sembilannya menunjukkan keunikan tersendiri apabila dibandingkan dengan nasionalis lain seperti Bahaman, Mat Kilau dan yang lain kerana kebangkitan orang Adat Perpatih menentang penjajahan bukan atas tujuan kepentingan golongan tertentu, golongan elite ataupun atas sebab status seseorang tetapi demi menjaga maruah sebagai sebuah kerajaan demokrasi berdaulat dan untuk kepentingan serta kebebasan rakyat atas keseluruhannya. Tetapi melalui masa dan dengan menularnya nilai-nilai baru 'tertentu', yang secara tidak langsung telah merubah sistem nilai dan sikap kolektif serta komunalistis kepada individualistis serta materialistis, akhirnya di abad kesembilanbelas orang-orang Adat Perpatih telah terperangkap dengan nafsu lantas dapat ditundukkan. Keadaan yang hampir serupa sedang berlaku sekarang.

Kedua-dua keunikan tersebut, terutama sekali yang terakhir disebut di atas tidak bermakna dan tidak dapat dibanggakan oleh orang Adat Perpatih senadainya sejarah sosial dan politik Negeri Sembilan tidak dituliskan secara baik. Daripada huraian yang terdapat dalam penulisan ini nyata masih banyak kekosongan dan kegelapan serta ketidakpastian fakta dan data dalam persejarahan dan pensejarahan Negeri Sembilan. Kesemua masalah ini harus dan mesti diatasi secepat mungkin. Pihak-pihak tertentu dan yang berkuasa harus bertindak sekarang. Sumber-sumber, data dan dokumen sejarah yang ada di luar negara seperti Portugal, Belanda, Germany dan England serta yang ada dalam negeri harus dikaji dengan teliti, terperinci dan kritikal agar segala masalah persejarahan dan pensejarahan Negeri Sembilan dapat diatasi. Justeru itu baharulah terserlah dan dapat disemboyankan tentang keunikan Negeri Sembilan dan Adat Perpatihnya, baik dari segi tamaddunnya mahupun dari segi ketahanannya menentang penjajahan!

NOTAKAKI

1) Pada zaman pemerintahan Hayam Wuruk (1350 - 1389) Sang Hyang Hujung atau Tanjung tuan (Coedes, 1968: 244, Wojowasito, 1960:60) sekarang adalah sebuah daripada pusat negeri yang diperintah oleh Majapahit. Besar kemungkinan Kuala Penajoh merupakan salah satu pusat petempatan dan perdagangan yang terlingkung di bawah wilayah Sang Hyang Hujung. Kuala Penajoh sebagai petempatan ini berlanjutan sehingga zaman pemerintah Sultan Mahmud (1488 - 1511) Melaka (Sejarah Melayu, 1954:202).

2) Sejak awal abad ke tujuh belas pusat Kerajaan Melayu Johor sering berpindah. Misalnya: pada tahun 1716 daripada Batu Sawar pindah ke Lingga; Lingga telah ditawan oleh Aceh pada tahun 1623; Antara tahun 1623 - 1637 Kerajaan Johor tidak mempunyai pusat pentadbiran yang tetap. Pada tahun 1640 - 41 Johor pula melanggar Melaka. Di sepanjang tahun 1666 - 1690 Johor berperang dengan Jambi; Jambi telah memusnahkan kerajaan Johor di Batu Sawar pada tahun 1673.

3) Siapa dia Raja Ibrahim? Mengikut lapuran Gebenor Burt:

Raja Ibrahim mengumumkan dirinya sebagai sepupu Raja Johor; tetapi sebenarnya beliau adalah seorang pemimpin agama Islam yang melarikan diri; yang menurut berita angin telah diusir oleh pengikut-pengikutnya di Sumatera dan juga oleh orang Aceh ..

(Bremner, 1927: 68 - 69)

4) Apa yang menyebabkan kematian Raja Ibrahim tidak diketahui dengan jelas. Pada bulan Oktober 1678 Belanda telah diberitahu oleh orang Melayu daripada Kelang dan Muar tentang kematian Raja Ibrahim dibunuh oleh orang Rembau yang enggan meneruskan peperangan menentang Belanda (Raja Ibrahim, mengikut Laporan Gabenor Bert, bersama seramai lebih kurang tujuh ribu orang pengikutnya daripada Rembau telah menyerang Melaka pada tahun 1677 - Carbon, 1948: 111 - 112). Tetapi dalam 1680 seorang Bugis yang dipanggil Baggia telah mendakwa bahawa dia telah membunuh Raja Ibrahim di Rembau (Andaya, 1987: 152 - 153).

- 5) Raja Kasah, mengikut sejarah lisan Rembau adalah pengikut Raja Kecil, raja keturunan Minangkabau yang berkuasa di kerajaan Johor - riau antara tahun 1717 - 1722. Secara kebetulan Raja Kasah ini adalah putera keturunan raja Minangkabau. Semasa di Rembau (1722) Raja Kasah terlibat dalam peperangan membantu Raja Kecil mempertahankan kedudukannya sebagai Sultan Johor; dan terlibat langsung dalam konflik mengeluarkan putera-putera Bugis daripada Johor-Riau. Justeru itu, secara tidak langsung Rembau telah terlibat dalam konflik dalaman istana Johor - Riau. Apabila Raja Sulaiman (kemudian bergelar Sultan Sulaiman Badrul Alam shah) dengan bantuan putera-putera Bugis seperti Daerah Merewah (kemudian menjadi Yamtuan Muda Riau) dan Daerah Menampok (kemudian bergelar Raja tua) berjaya mengusir Raja Kecil, Raja Kasah dan Rembau berada dalam keadaan delima.
- 6) Akibat kekalahan Raja Kecil dan berkuasanya Raja Sulaiman yang dibantu oleh kekuatan putera Bugis; Rembau terpaksa, berserta sebab-sebab lain mengeluarkan Raja Kasah daripada Rembau. Kekalahan Raja Kecil secara tidak langsung telah mengamcam 'kebebasan' Rembau dan sekutunya.
- 7) Sebagai tanda/bukti wakil Kerajaan Johor - riau, Raja Adil telah membawa bersamanya satu cop mohor (Wilkinson, 1911: 23). Beliau adalah seorang putera keturunan Bugis (Winstedt, 1962: 152). Raja Adil dipilih mewakili Johor di Rembau mungkin atas kehendak putera-putera Bugis. Dengan adanya seorang pembesar berketurunan Bugis di Rembau, dapatlah Rembau diperalatkan untuk membantu Johor dan juga putera-putera Bugis menyerang Belanda di Melaka. Kepada putera-putera Bugis pula, dengan hadirnya Raja Adil di Rembau, sekiranya berlaku pertelingkahan dengan Johor, mereka mempunyai tempat perlindungan. Walaupun Selangor (kawasan Daerah Port Dickson sekarang) berada dalam 'kekuasaan' Bugis, namun kedudukan Rembau di bahagian pendalaman lagi menjadikannya satu tempat pertanian yang baik bagi orang-orang Bugis jikalau mereka di 'kejar' musuh, terutama Belanda.
- 8) Dari segi geografi politik adat Luak Rembau terbahagi dua, iaitu Rembau Darat dan Rembau Baroh. Hampir kesemua Penghulu Rembau datang daripada Rembau Baroh. Perpecahan wilayah Rembau Darat dan Baroh ini berlaku di seketiar awal abad ke enam belas.

- 9) Mengikut pensejarahan Rembau, antara tahun 1660 - 1750 perlantikan Penghulu Rembau telah tidak mengikut kebiasaan peraturan adat. Dalam tempoh hampir se abad ini jawatan Penghulu, yang dipatutnya bergelar antara waris Jakun dan waris Jawa, telah disandang terus menerus oleh ahli-ahli waris Jawa sahaja. Pada tahun 1750 barulah waris Jakun - Datuk Lulinsoh - diberi gelaran. Mengikut sejarah lisan Rembau, Datuk Lulinsoh telah merampas pusaka Penghulu Rembau di hari pengkebumian Datuk Sabut dengan menduduki kerusi yang terletak di bahagian kepala keranda jenazah dan membunuh calun waris Jawa (kerusi yang terletak di bahagian kaki jenazah diduduki oleh Datuk Perba, Lembaga suku waris). Dalam peristiwa ini, Lulinsoh telah diberi sokongan oleh Raja Adil; dan atas pengaruh dan kedudukannya, Lulinsoh telah diterima sebagai Penghulu Rembau oleh ketua-ketua adat Rembau tanpa konflik yang berlanjutan.
- 10) Putera-putera Bugis balik ke riau kerana membawa jenazah balik janazah sultan Abdul Jalil Muazzam Shah yang meninggal di Selangor dalam bulan Februari 1761. Peristiwa ini juga telah membalikkan semula kekuasaan Bugis dalam Kerajaan Johor - riau.
- 11) Raja Adil, setelah dikeluarkan daripada Rembau telah pergi ke Jelebu dan tinggal di rumah isteri pertamanya di Pita Serambi, Ulu Kelawang.
- 12) Percubaan Kerajaan Johor untuk menguatkan pengaruhnya telah bermula sejail awal lagi. Misalnya sebelum Raja Adil, Sultan Sulaiman, selepas merampas semula kuasa dari Raja Kecil, telah mengwujudkan wakilnya di Rembau. Wakil tersebut dikurnia gelaran Datuk Shahbandar. Ini terjadi di sekitar tahun 1720an. Apabila Raja Adil sampai, kedudukan Datuk Shahbandar ini diturunkan kepada taraf 'kepala waris' sahaja. Selepas Raja Adil, Kerajaan Johor telah meneruskan usaha untuk berpengaruh di Rembau dengan 'menghantar' dan/atau melantik pembesar-pembesar sebagai wakil. Misalnya di sekitar tahun 1790an Sultan Johor iaitu selepas kematian Datuk Lilinsoh, telah melantik Datuk Mangkubumi sebagai wakilnya.
- 13) Selain dari pengalaman tersebut, keinginan Johor menguasai Rembau dan tekanan Belanda di Melaka juga menjadi punca keinginan mempunyai 'raja' tersebut. Di samping itu, sistem sosial dan Politik Rembau dan Negeri Sembilan sendiri memerlukan seorang raja sebagai lambang keadilan. Konsep keadilan ini banyak tersebut di dalam berbagai perbilangan adat yang memperihalkan struktur dan organisasi sosio-politik Negeri Sembilan (Adat Perpatih).

- 14) Mereka adalah Panglima Bandan dan Panglima Bandut. Pengiring mereka terdiri dari Datuk-Datuk Johan, Andatar, Laksamana, Panglima Sutan dan Panglima Raja (Lister, 1887: 41; Rasjid Manggis, 1970:89).
- 15) Melewar itu adalah gelaran atau nama panggilan yang mungkin diberikan oleh Penghulu-Penghulu Luak di Negeri Sembilan akibat dari perjalanannya untuk tiba ke Rembau daripada Minangkabau. Dalam loghat Negeri Sembilan melewar atau melawa bermaksud perbuatan merayau, singgah menyinggah dan memperagakan diri di beberapa tempat. Dalam bahasa Minangkabau pula lewa(r) = melewa bererti menyemboyankan atau memberitahu sesuatu hal kepada orang banyak dengan mulut atau dengan canang (Thaib, 1935:15).

Catatan sejarah Negeri Sembilan menyatakan bahawa Raja Melewar datang ke Negeri Sembilan membawa beberapa adat kebesaran. Antara yang penting ialah surat watikah. Surat watikah ini harus dibawa oleh setiap anak raja Minangkabau yang bakal dilantik menjadi Yamtuan. Berdasarkan cop mohor yang ada pada watikah yang dibawa oleh Raja Labu (Laboh) iaitu raja Minangkabau yang terakhir dijemput tetapi tidak dilantik menjadi Yamtuan; dalam tahun 1826, negeri-negeri yang dilalui oleh Raja Labu dan mungkin juga oleh Raja Melewar adalah Palembang, Jambi, Indragiri, Sungai Paku-Bandar Sepuluh, Indrapura, Pariaman dan Siak (Newbold, 1939:82 - 83).

Tujuan mengunjungi (singgah meyinggah atau melawa) negeri-negeri tersebut adalah untuk mendapat cop mohor raja-raja atau sultan-sultan berkenaan, dan memberitahu mereka akan perlantikannya sebagai Yamtuan Negeri Sembilan (hal yang hendak diberitahu dan/atau disemboyankan) serta pengiktirafan dan perestuan mereka yang berkenaan. Perbuatan Raja Mahmud yang singgah menyinggah di negeri-negeri tersebut dan memberitahu sultan-sultan berkenaan, yang sudah tentu mengambil masa yang lama telah membuatkan pembesar-pembesar Negeri Sembilan menggelarkan Raja Mahmud, raja melewar (Norhalim bin Hj. Ibrahim, 1993:12 - 13).

16. Raja hitam adalah anak raja kedua yang didatangkan daripada Minangkabau. Beliau telah dibawa ke Rembau dan ditabalkan sebagai Yamtuan Besar di Penajoh Rembau pada tahun 1795.

17. Untuk Yamtuan Muda Rembau ini telah wujud di pertengahan abad ke 18. Pusaka tersebut disandang oleh Raja Adil (1740an - 1761).
18. Untuk keterangan lanjut mengenai pertelingkahan antara Penghulu dengan Yamtuan Muda Rembau lihat Norhalim Hj. Ibrahim 1978:16 - 40.
19. Raja Adil adalah cucu sepupu kepada Raja Adil, Yamtuan Muda Rembau II.
20. Mereka adalah Datuk Seri maharaja, Lembaga suku Paya Kumbuh Darat, Datuk Sirida Maharaja, suku Seri Lemak, Datuk Andika, suku Batu Belang dan Datuk Mendelika Lembaga suku Seri Melenggang.
21. Mereka adalah Datuk Gempa Maharaja, Lembaga suku Batu Hampar Baruh; Datuk Merbangsa, suku Paya Kumbuh Baruh; Datuk Bangsa Balang, suku Tiga nenek dan Datuk Samsura pahlawan Lembaga suku Mungkal.
22. "to make the sons of fishermen and the peasants a more intelligent fishermen or peasants than their father had been".
23. Mengikut Josselin de Jong (1960:195 - 199) konflik ini berakhir dengan kemenangan pihak adat. Apa yang harus diambil perhatian mengenai penulisan Josselin de Jong ialah beliau tidak mengambilkira mengenai satu lagi konflik 'tertutup' yang sedang berlaku pada waktu yang sama. Konflik 'tertutup' ini telah mula sejak tahun 1941 dan berakhir di sekitar tahun yang sama dengan konflik terbuka (antara UMNO dan pencinta adat (1951)). Konflik 'tertutup' ini adalah konflik dalaman iaitu di kalangan ketua-ketua adat di Rembau (Norhalim bin Hj. Ibrahim, 1989: 15 - 17).
24. Krisis adat di Luak Ulu Muar yang melibatkan peringkat perut dan suku telah mendapat publisiti dalam akhbar tempatan terutama Utusan Melayu. Krisis ini berlaku di tahun 1965 hingga 1970 (abdul Aziz Zakaria, 1984).

BIBLIOGRAFI

Singkatan

- BIK Bijdragen Tot de taal ,Land-en Volkenkunde
Leiden.
- JAMBRAS JOURNAL of the Royal Asiatic Society -
Malaysian Branch Kuala Lumpur.
- JSBRAS Journal of the Royal Asiatic Society - Straits
Branch Singapore.
- PMS Papers on Malay Subjects, Kuala Lumpur.
- Abas Haji Rembau sebuah daripada Luak-Luak Yang Sembilan,
Ali, 1953 Rembau: Jabatan Undang Rembau.
- 1954 'sebahagian Dasar Adat (tinjauan secara umum)'
kertas kerja seminar Persejarahan dan Adat
Perpatih, Seremban.
- Abdul Aziz' 'Krisis kepimpinan Di Luak Tanah Mengandong:
Hitam, 1984 Satukajian kes di Luak Ulu Muar', kertaskerja
Seminar Kebangsaan Adat Perpatih dan Wilayah
Seminar Kebangsaan Adat Perpatih dan Wilayah
Budaya Negeri Sembilan, Serdang.
- Andaya, Kerajaan Johore 1641 - 1728, Kuala Lumpur:
L.Y. 1987 Dewan Bahasa dan Pustaka.
- Baharom Azhar Raffie'i, 1984, 'Perhubungan Inter enik dalam
Masyarakat Adat, kertas kerja Seminar Kebangsaan
Adat Perpatih dan Wilayah Budaya Negeri
Sembilan, Serdang.
- Bremner, M.J. (Rentim), 1927, 'Report of Governor Balthasar
Bott in Malacca 1678', JMBRAS 5(1):1 - 232.
- Braddell, T., 1856, 'Notes on Naning , with a brief Notice of
the Naning War',
Journal of the Indian Archipeloggo and Easter Asia,
1: 194 - 232.
- Buyung Adil, 1952, Sejarah Alam Melayu V, K. Lumpur: Pejabat
karang Mengarang Jabatan Pelajaran.
- _____, 1981, Sejarah Negeri Sembilan, K. Lumpur:
Dewan Bahasa dan Pustaka.
- Cordon, R, 1948, 'Old Malacca: Tranqueira and Gajah Berang;
JMBRAS 42 (2): 130 - 144.

- Chung Siok - Hwa, 1969, 'The Rice Industry of Malaya: A Historical Survey', JAMBRAS 42 (2):130 - 144.
- Coedes, G., 1968, The Indianized States of Southeast Asia, New York Mc Graw - Hill Book Co.
- Hervey, D.F.A. 1884, 'Rembau', JSBRAS, 13: 241 - 260.
- Hooker, M.B., 1970, Adat Law in Modern malaya, K. Lumpur: Oxford University Press.
- _____, 1971, 'The Early Constitution of Negeri Sembilan (1773 - 1824)', JMBRAS, 44(1): 104 - 116.
- Hua, Wu Yin, 1983, Class and Communalism in Malaya, London: Zed Book Ltd.
- Ismail Ambia, 1959, 'Pentadbiran Adat Perpatih Negeri Sembilan', Latihan Ilmiah, Singapore: Universiti Malaya Singapore.
- Josselin de Jong, P.E. de, 1960, 'Islam versus Adat in Negeri Sembilan (Malaya)', BBlk, 166: 158 - 203.
- Khoo Kay Kim, 1972, The Western Malay States 1850 -1873, K. Lumpur Oxford Univeristy Press.
- _____, 1990, 'Negeri Sembilan: Sejarah Awal dan Sistem Politiknya', dlm. Norazit Selat, (ed.), Negeri Sembilan Dahulu dan Sekarang, K. Lumpur: Muziam Negara.
- Lim Man Hui, 1892, 'Capitalism and Industrialization in Malaysia; Bulletin of Concerned Asian Scholars, 14(1): 32 - 47.
- Lister, M, 1887, 'The Malay Law in Negeri Sembilan in Negeri Sembilan', JSBRAS, 22: 299 - 319.
- Mansoer, M.D. dll, 1970, Sejarah Minangkabau, Djakarta: Bhratara.
- Maxwell, W.G. dan Gibson, W.S., 1924, Threaties and Engagements Affecting the Malay States an London: Truscott and sons.
- Newbold, T.J, 1939, The British Settlements in the Straits of Malacca K. Lumpur: Oxford University Press.
- Norhalim Hj. Ibrahim, 1971, 'Kekeluargaan dan Ekonomi dalam Masyarakat Desa di Rembau, Latihan Ilmiah, K. Lumpur: University Malaya.

- _____, 1976 'Social Change and Continuity in the Matrikmeal Society of Rembau, Negeri Sembilan, M.A. tesis, Hull: University of Hull.
- _____, 1978, 'The Yang Dipertuan Besar of Negeri Sembilan and the Yang Dipertuan Muda of Rembau, 'Warisan 4/5: 16 - 63.
- _____, 1988, 'Some Observation on the Adat and Adat Leadership in Rembau, Negeri Sembilan,' Journal of Southeast Asian Studies, 26(2):150 - 165.
- _____, 1989 'The Negeri Sembilan Adat Through Time with special reference to Rembau', latar kerja The Malay Seminar, Kyoto: University of Kyoto.
- _____, 1989a, 'Perkembangan dan Perubahan Adat Negeri Sembilan', kertas kerja Seminar Persidangan Antarabangsa Pengajian Melayu, K. Lumpur: Universiti Malaya.
- _____, 1990, 'Tanah Adat Terbiar di zaman Pembangunan', dlm. Norazit Selat (ed.), Negeri Sembilan Dahulu dan Sekarang, K. Lumpur: Muzium Negara.
- _____, 1992, 'Vanishing Culture of Adat Perpatih', dlm Nellie, S.L. dan Patel, V. (ed.), Adat Perpatih, K. Lumpur Wintrac. hal: 37 - 43.
- _____, 1992, 'Social Structure and Organization of Negeri Sembilan Malays', Nellie, S.L. dan Patel V. (ed.), Adat Perpatih, K. Lumpur: Wintrac. hal: 44 - 64.
- _____, 1993, Adat Perpatih Perbezaannya dan Persamaannya dengan Adat Temenggung, K. Lumpur: Fajar Bakti.
- Ong Ai Hua 1983,, 'Global Industries and Malay Peasants in West Malaysia', dlm. Jun Nash dan Fernandez Kelly, M.P. (ed.), Women, Men, and International Division of Labour, albany: Suny Press.
- Parr, C.W.C. dan Mackray, W.H, 1910, 'Rembau, one of the Nine States', JSBRAS, 56: 1 - 157.
- Peletz, M, 1983, 'A Share of the Harvest: Kinship, Property and Social History among the Malays of Rembau', tests Ph.D., Machigan: The University of Machigan.

- Rasjid Nanggis, Dt. Radjo Panghoebe, 1970, Negeri Sembilan, Hubungannya dengan Minangkabau Terkembang, Bukittinggi: Pustaka Sa'adijah.
- Sadka, E. 1968, The Procted Malay States 1874 - 1895, K. Lumpur: University of Malays Press.
- Skinner, M.A., 1878, 'Pabie Pass Rembau', JSBRAS, 2: 227 - 229.
- Sheppard, M., 1965, A Short History of Negeri Sembilan, Singapore Eastern Universities Press.
- Sutcliffe, G. 1959, 'A History of Education in Negeri Sembilan', tesis M.A., London: University of London.
- Thio, E., 1969, British Policy in the Malay Peninsular, 1880 - 1910, K. Lumpur: Oxford University Press.
- Tun Seri Lanang, 1612 (?), Sejarah Melayu, Publishing House, edisi Shellabear, W.H. 1954.
- Wilkinson, R.J. 1911, 'Notes on NegeriSembilan', PMS, K. Lumpur: Government Printer.
- Winstedt, R.O., 1934, 'NegeriSembilan: The History, Polity and Beliefs', JMBRAS, 12(3): 41 - 114.
- _____, 1972, A History of Malaya, Singapore: Marican and Sons.
- Wojowasito, Drs. S., 1960, Sejarah Kebudayaan Indonesia Jakarta: Ren. Kalimosodo.